

五禮通考

自二百卅九
至二百卅七

內閣文庫		
番號	漢	1829
冊數	160 (109)	
函號	別	5 1



五禮通考卷第二百三十七

淺草文庫

內廷供奉禮部右侍郎金匱秦蕙田編輯 翰林院侍讀學士嘉定王鳴盛

參校

太子太保總督直隸右都御史桐城方觀承同訂 兩淮都轉鹽運使德水盧見曾

軍禮五

出師一

蕙田案先王不得已而用師師必以律律與禮相為表裏者也師出不以律猶無師也律不以禮猶無律也故出師之際禮尤重焉今集經史及諸家之言列出師一門此書以議禮非言兵也故行陣擊刺之事從略而於類禡宜造命將誓師及凱旋宣捷諸儀節則加詳焉正史之外采唐五代會要開元禮政和新儀通典通考明集禮會典附益之

易師卦師貞丈人吉无咎 彖曰師衆也貞正也能以衆正可以王矣剛中而應行險而順以此毒天下而民從之吉又何咎矣 象曰地中有水師君子以容民畜衆 初六師出以律否臧凶象曰師出以律失律凶也 九二在師中吉无咎王三錫命象曰在師中吉承天寵也王三錫命懷萬邦也 六三師或輿尸凶象曰師或輿尸大無功也 六四師左次无咎象曰左次无咎未失常也 六五田有禽利執言无咎長子帥師弟子輿尸貞凶象曰長子帥師以中行也弟子輿尸使不當也 上六大君有命開國承家小人勿用象曰大君有命以正功也小人勿用必亂邦也

程子曰師為卦坤上坎下以二體言之地中有水為衆聚之義以二卦之義言之內險外順險道而以順

行師之義也以爻言之一陽而為衆陰之主統衆之象也比以一陽為衆陰之主而在上君之象也師以一陽為衆陰之主而在下將帥之象也

大易紀聞初六出師而嚴其律九二帥師而得其人戒六三之輿尸而一其令審六四之左次而重其進去天下之害而不自為害此皆六五之君得興師之道操任將之法至上六而功成治定師之道終焉六爻中出師駐兵將將與奉辭伐罪旋師班賞無所不載雖後世兵書之繁不如師卦六爻之略也

謙卦六五利用侵伐无不利 上六利用行師征邑國 朱子語類問謙是不與人爭如何五上二爻皆言利用侵伐利用行師曰老子言大國下小國則取小國小國下大國則取大國又言抗兵相加哀者勝矣大

賈八
抵謙自是用兵之道只退處一步耳如必也臨事而懼皆是此意

豫卦豫利建侯行師

程子曰豫順而動也諸侯和順則萬民悅服兵師之興衆心和悅則順從而有功故悅豫之道利于建侯行師也又上動而下順諸侯從王師衆順令之象君萬邦聚大衆非和悅不能使之服從也

離卦上九王用出征有嘉折首獲匪其醜无咎象曰王用出征以正邦也

程子曰九以陽居上在離之終剛明之極者也明則能照剛則能斷能照足以察邪惡能斷足以行威刑故王者能用如是剛明以辨天下之邪惡而行其征伐則有嘉美之功也征伐用刑之大者夫明極則無

微不照斷極則无所寬宥不約之以中則傷于嚴察矣去天下之惡若盡去其漸染註誤則何可勝誅所傷殘亦甚矣故但當折取其魁首所執獲者非其醜類則无殘暴之咎也書曰殲厥渠魁脅從罔治

書允征威克厥愛允濟愛克厥威允罔功

仲虺之誥兼弱攻昧取亂侮亡推亡固存邦乃其昌傳弱則兼

之闇則攻之亂則取之有亡形則侮之有亡道則推而亡之有存道則輔而固之

康王之誥太保芮伯咸進曰張皇六師無壞我高祖寡

命傳言當張大六師之衆

周禮春官大宗伯大師之禮用衆也

鄭氏鐸曰五軍以為師以師統軍以軍統旅以旅統卒以卒統兩以兩統伍上下相統聞鼓進聞金止此大師之禮以用衆故欲其同

夏官大司馬制軍誥禁以糾邦國以九伐之法正邦國馮弱犯寡則青之賊賢害良則伐之暴内陵外則壇之

野荒民散則削之負固不服則侵之賊殺其親則正之
 放弑其君則殘之犯令陵政則杜之外內亂鳥獸行則
 滅之注馮猶乘陵也言不字小而侵侮之青猶人青瘦也王霸記曰四面削其地春秋傳曰粗者曰侵精者曰伐又曰有鐘鼓曰伐則伐者兵入其竟鳴鐘鼓以往所以聲其罪

及師大合軍以行禁令以救無辜伐有罪注師所謂王巡守若會同司馬起師合軍

以從所以威天下行其政也

王氏昭禹曰及師大合軍謂命將或王親征之時

鄭氏鏐曰大合軍旅非以肆暴也以行禁令所以申明乎九法也以救無辜所以明王者之仁也以伐有罪所以明王者之義也

禮記曲禮班朝治軍涖官行法非禮威嚴不行

陳氏澔曰治軍旅左右之局非禮則威嚴不行

右師名義

禮記月令孟春之月不可以稱兵稱兵必天殃

季夏之月不可以起兵動眾

孟秋之月天子乃命將帥選士厲兵簡練桀俊專任有

功以征不義詰誅暴慢以明好惡順彼遠方

陳氏澔曰專任有功謂大將有已試之功乃使之專主其事也詰者問其罪誅者戮其人殘下謂之暴慢上謂之慢

右出師時令

周禮夏官大司馬若大師則掌其戒令

易氏祓曰若有強梗弗率者負固弗服者與夫侵犯王略而自干天誅者天子于是親帥六師方伯連帥從焉謂之大師大司馬掌其戒令則方伯連帥以至軍將帥帥莫不受戒令焉

鄭氏鏐曰或謂用師則大司馬為大將固掌號令以指麾六軍矣此言若大師則掌其戒令者蓋此乃王親出征之時也王自出軍則王自將號令皆出于王

詩小雅常武序常武召穆公美宣王也有常德以立武

事因以為戒然

詩緝嚴氏粲曰此詩王親征淮北之夷及徐方也召公既平淮南之夷未幾淮北之夷復挾徐方以叛宣王于是親征之召公慮其徂勝而喜功也故因美而戒之

蕙田案親征之事如黃帝之征蚩尤及夙沙氏夏啟戰甘之師武丁荆楚之伐皆是也湯南巢之戰武牧野之戰亦屬親征而其事又別後世如隋之征高麗唐太宗之征突厥宋真宗景德澶淵之師與明成祖之征蒙古本雅失里阿魯台瓦剌馬哈木等英宗之征也先武宗之征宸濠或有合于奉辭伐罪之義或徒出于窮兵黷武之為孰得孰失史有明文學者折衷于經可也

右親征

禮記王制諸侯賜弓矢然後征賜鈇鉞然後殺

馬氏晞孟曰征與殺先王所以致天討弓矢鈇鉞先王所以致天討之器諸侯必俟天子之賜然後得以征伐者臣無有作威所用則君之賜而已以征對殺則殺為重以弓矢對鈇鉞則鈇鉞為重諸侯之出討有罪未賜斧鉞而有所不敢殺則亦征之而已

書大禹謨帝曰咨禹惟時有苗弗率汝徂征禹乃會羣

后誓于師三旬苗民逆命益曰惟德動天無遠弗届矧

兹有苗禹拜昌言曰兪班師振旅帝乃誕敷文德舞干

羽于兩階七旬有苗格傳舞文舞于賓主階間抑武事也據器有武有文俱用以為舞而不用於敵故

書允征惟仲康肇位四海允侯命掌六師義和廢厥職

酒荒于厥邑允后承王命徂征

林氏之奇曰羿之立仲康也方將執其禮樂征伐之權以號令天下義和黨惡于羿允侯承王命徂征之以剪羿羽翼故終仲康之世羿不得以逞也

詩大雅皇矣密人不恭敢距大邦侵阮徂共王赫斯怒

爰整其旅以按徂旅以篤周祜以對于天下依其在

京侵自阮疆陟我高岡無矢我陵我陵我阿無飲我泉

我泉我池度其鮮原居岐之陽在渭之將萬邦之方下民之王

詩緝嚴氏粲曰文王以西伯討密之罪先駐兵國都依憑此在京之師以為聲勢然後出兵自阮疆以侵密

帝謂文王詢爾仇方同爾兄弟以爾鈞援與爾臨衝以伐崇墉臨衝閑閑崇墉言言執訊連連攸馘安安是類是禡是致是附四方以無侮臨衝第第崇墉仡仡是伐是肆是絕是忽四方以無拂

朱子詩傳述文王伐崇之事

棫樸泝彼涇舟烝徒楫之周王于邁六師及之

詩緝嚴氏粲曰三章述戎事之得人也文王之時北有獫狁之難文王以天子之命命將遣戍以討之必渡涇水也

豳風東山序東山周公東征也

我徂東山惓惓不歸我來自東零雨其濛我東曰歸我心西悲制彼裳衣勿士行枚蝟蝟者蠋烝在桑野敦彼

獨宿亦在車下

箋周公攝政三監及淮夷叛周公乃東伐之三年而後歸

何氏楷曰朱子云東山之詩言自我不見于今三年則居東之非東征明甚蓋周公居東二年成王因風雷之變既親迎以歸三叔懷流言之罪遂脅武庚以叛成王命周公征之其東征往返首尾又自三年也案逸周書作雒解云師旅臨衛攻殷殷大震潰降群三叔祿父者奔管叔經而卒所征熊盈族十有七國俘維九邑俘殷獻民遷于九畢竹書成王三年王師滅殷殺武庚祿父遷殷民于衛遂伐奄滅蒲姑四年王師伐淮夷遂入奄五年王在奄遷其君于蒲姑夏五月王至自奄此則東征之役斧斨破缺蓋歷三年也

蕙田案金縢篇孔安國傳以我之弗辟為刑辟之辟并即以居東二年為東征誅管蔡之事鄭康成詩箋以弗辟為避而以居東二年為避居東土蔡仲默因之竊謂一聞流言遽興兵而東誅二叔恐周公未必專擅如此惟避居二年積誠相感王心稍悟然後作鴟鴞以開解王心及乎風雷感泣發匱得書皮弁親迎之後乃敢用我斨我斧奉王命而致討

居東二年征東三年自是二事豈可併為一談也古雖有專征之禮然如孔傳說適足為亂臣藉口當從康成為是何氏據逸周書竹書證之疑或然也

破斧序破斧美周公也

既破我斧又缺我斨周公東征四國是皇哀我人斯亦孔之將

書費誓序魯侯伯禽宅曲阜徐夷並興東郊不開作費

誓傳徐戎淮夷並起為寇于魯故東郊不開魯侯征之于費地而誓衆

詩秦風小戎序小戎美襄公也備其兵甲以討西戎西戎方疆而征伐不休國人則矜其車甲婦人能閱其君子焉

右諸侯專征

禮記王制天子將出征類乎上帝

蕙田案王制所說類宜造之禮凡二見其一為巡守之禮其一為征伐之禮鄭康成皆注云其禮亡則三代以上儀節之詳已不可見然散見各經者尚多今採取特備唐及明諸儀甚詳今略撮其要以備考又案孔疏爾雅所釋多為釋詩以皇矣云是類是禡故釋為師祭不謂餘文皆為師祭但類者以事類告天若以攝位事類告天亦謂之類故尚書舜典云肆類于上帝是也或以巡狩事類告天亦謂之類故王制云天子將出類乎上帝是也

周禮春官大祝大師類上帝則前祝

注前祝大師自前祝也王出將有事于神大祝居前先以

祝辭告之疏王出六軍親行征伐曰大師軍將出類祭上帝告天以行大祝先告王後臨也

王氏安石曰司馬法曰將用師乃告于皇天上帝日月星辰詩曰是類是禡爾雅曰此師祭也所謂類上帝也

鄭氏鐸曰凡此事大祝處前告神故曰前祝

王氏昭禹曰大祝前于群祝

肆師類造上帝則為位

鄭氏鐸曰上帝至尊不可以瀆因其事類然後告祭故名曰類類者上帝之祭造者祖廟之祭此曰類造上帝何也蓋王者出征所至以事類告天故兼言之非常祭故為之位蓋肆師主立國祀之禮耳

孔叢子問軍禮先期五日太史誓于祖廟擇吉日齋戒然後乃類上帝柴于郊以出

司馬法先王之治順天之道設地之宜官民之德而正名治物立國辨職以爵分祿諸侯諸侯懷海外來服獄弭而兵寢聖德之治也其次賢王制禮樂法度乃作五刑興甲兵以討不義巡狩省方會諸侯考不

同其有失命亂常背德逆天之時而危有功之君徧告於諸侯彰明有罪乃告於皇天上帝日月星辰然後冢宰徵師於諸侯曰某國為不道征之以某年月日師至於某國會天子正刑

書湯誥敢用元牡敢昭告于上帝神后請罪有夏以與

爾有眾請命

蔡傳元社夏尚黑未變其禮也

詩大雅皇矣是類是禡注類出師祭上帝

爾雅釋天是禡是禡師祭也注師出征伐禡于上帝

書泰誓予小子夙夜祗懼類於上帝以爾有眾底天之

罰

蔡傳言予小子畏天之威早夜敬懼不敢自寧告于天地神祇以爾有眾致天之罰于商也

詩周頌桓序桓講武類禡也桓武志也

綏萬邦屢豐年天命匪解桓桓武王保有厥士于以四方克定厥家於昭于天皇以間之

孔叢子問軍禮凡類禡皆用甲丙戊庚壬之剛日

通典梁武帝天監初陸璉定軍禮依古制類造等用牲幣帝曰宜者謂征討得宜造者稟謀於廟類者奉天時以明伐並明不欲自專陳幣承命可也璉不能對嚴植之又爭之於是告用幣反亦如之

北齊親征纂嚴則服通天冠文物充庭有司表更衣乃入冠武弁左貂附蟬以出誓訖次擇日陳六軍備大駕類于上帝

隋大業七年征高麗於宮南類上帝積柴燎壇設高祖位于東方帝服大裘而冕乘玉輅祭奠玉帛並如宜社諸軍受胙畢帝就位觀燎乃出將發帝御臨朔宮親受

節度遂出

唐開元禮皇帝親征類于上帝纂嚴前一日本司承

制宣攝內外諸司各隨職備辦施御幄於太極殿北壁下南向如常守宮設群官文武次于東西朝堂如常儀陳革輅及玉輅以下車旗之屬如常未明一刻開諸宮門諸衛勒所部列黃麾仗屯門及陳於殿庭如常儀其日平明留從之官悉集朝堂次侍臣服平巾幘袴褶其將帥等及從行之官亦平巾袴褶留守之官公服上水五刻侍中版奏請中嚴文武官各列于殿庭上水三刻通事舍人引群官俱詣閣奉迎皇帝服武弁服侍衛如常即御座南向坐典儀唱再拜群臣皆再拜訖中書令承旨勅百寮訖通事舍人以次引群官出侍中跪奏禮畢俛伏興皇帝降御座乘輿入自東房侍中從至閣

齋戒前一日皇帝清齋於太極殿諸應告之官及群官客使等各於所司及公館諸軍將各於正寢俱清齋一宿餘如郊祀儀 陳設前告三日陳設如巡狩告圜丘儀社設大次于社宮西門之外道北南向設告官等次以下如祭社之儀 又設軍將次於外壎南門外

道東西向北上前二日設樂懸燎壇群官版位等並如告圓丘之儀又設將軍位於應南每等異位重行北面西上軍將門外位於南壇外道東西向北上社軍將位次于社宮北門之外

道東俱南向北上設樂懸等如祭社儀又為壘埴三于樂之北如常又前二日奉禮設御位于北門內當社壇南向設太史等奉血幣位于埴北如常郊社令帥府史一人又齋郎以罇坩罍洗篚幕入設皆如常 未明四刻太史令郊社各服其服升設神座如齊郎以豆取毛血如常 未明四刻太史令郊社各服其服升設神座如

常儀 鑾駕出宮皇帝武弁乘革輅備大駕及嚴鼓侍中奏請發內外器服皆如常儀前後備六軍 薦玉帛其日未明二刻下至太常卿引皇帝至內壎門並如巡

狩圜丘親告儀

天地大罇二實以沈齊明水實于上罇山壘二一實元酒為上一實清酒玉幣以蒼唯無禮部尚書太常卿陪從

皇帝至版位西向立每立定太常卿與博士俱退立于左 太常卿前奏請拜退

復位皇帝再拜以下至奠玉帛訖降壇還版位樂止並

如巡狩親告儀 進熟皇帝既升奠玉帛太官令出帥

進饌者以下至皇帝降壇還版位謁者引司徒降復位

並如巡狩圓丘親告儀宜社自行司徒降復位以上同巡狩告社儀 皇帝既降壇謁

者引諸軍將詣壇東階升進立於天帝神座前北面西

上宜社立于太社神座前南面西上 初軍將升太祝帥齋郎以爵酌福酒進

立於軍將之西東向北上宜社于軍將東西南上 軍將俱再拜受爵跪

祭酒啐酒奠爵興太祝各帥齋郎進俎減神前胙肉以

次授軍將受以授齋郎軍將俱跪取爵遂飲卒爵太祝

帥齋郎受爵復于坵軍將俱興再拜謁者引軍將降復太祝各進跪徹豆還罇所奉禮曰賜胙贊者唱眾官再

禮記

卷之三

拜眾官在位者皆再拜已欲福者不拜元和之樂作太常卿前奏

請再拜退復位皇帝再拜及燎燔以下至燔祝版並如

巡狩親告儀宜社自皇帝再拜以下至燔祝版並如巡狩告社儀鑾駕還宮如郊社儀

同宜社

遼史禮志將出師刑青牛白馬以祭天地其祭常依獨

樹無獨樹即所舍而行之

明大政紀洪武四年正月丁亥上親祀上下神祇告伐

明昇

明會典天子親征祭告天地洪武三年定凡祭告天地

前期擇日皇帝服武弁乘革輅備六軍以牲犢幣帛祭

告作樂行三獻禮

右類上帝

禮記王制天子將出征宜乎社

鄭氏鐸曰祭社曰宜蓋以事宜而祭之非春秋之所報此國內之禮

汪克寬經禮補逸宜出兵祭社之名社所以神地道

主陰先王建國左祖右社大社在庫門之內右國社

亦在公宮之右皆尚陰也陰主殺故誓社而田因田

而習軍旅出征祭之稱其義也然征既宜于社而又

類于上帝造于祖禰何哉蓋生殺非王者所得私也

類于上帝明奉天討也造于祖禰示受命于廟不敢

自專也曰類曰宜曰造祭雖先後不同合周官王制

泰誓言之其義各有攸當也

周禮春官大祝大師宜于社則前祝注則前祝大祝自前祝也王出將有事于此神大祝

居前先以祝辭告之

疏軍將出宜祭于社

孔叢子問軍禮先期五日太史誓于祖廟擇吉日齋

王氏安石曰案爾雅曰起大事動大眾必先有事于社而後出謂之宜所謂宜于社也

出師

戒既筮則獻兆于天子天子使有司以特牲告社告以所征之事而受命焉

司馬法與甲兵以討不義乃禱于后土四海神祇山川冢社

書泰誓宜于冢土

蔡傳冢土大社也

春秋成公十三年左氏傳春三月公及諸侯朝王遂從劉康公成肅公會晉侯伐秦成子受服于社不敬劉子曰吾聞之民受天地之中以生所謂命也是以有動作禮義威儀之則以定命也能者養之以福不能者敗以取禍是故君子勤禮小人盡力勤禮莫如致敬盡力莫如敦篤敬在養神篤在守業國之大事在祀與戎祀有執膳戎有受服神之節也今成子惰棄其命矣其不

反乎

疏宗廟之祀則有執膳兵戎之祭則有受服此是交神之節也

通典隋大業七年征高麗煬帝遣諸將於薊城南桑乾河上築社稷二壇設方壇行宜社禮帝齋于臨朔宮懷荒殿與告官及侍從各齋于其所十二衛兵士並齋帝服袞冕玉輅備法駕禮畢御金輅服通天冠還宮唐開元禮制遣大將出征有司宜于大社將告有司卜日如別儀前一日諸告官致齋於社所守宮設告官以下位各於常所諸將位於社宮北門外道西東向南上右校清掃內外又為瘞瘞二於南門內壇西南如常奉禮設告官以下版位如常儀設諸將位於北門內當太社壇南西面東上諸將門外位於北門外道西東向南上郊社令帥其屬設罇壘玉帛等如式執罇壘者位如常告日未明十刻太官令先具牢饌質明告官等各服

其服太史令諸社令升設神席良醞之屬入實罇罍玉幣

大罇及配座象罇實醴齊元酒各實于上罇王社稷兩珪有邸幣以元一丈八尺

奉禮帥贊者先入就位

贊引引御史太祝以下入行掃除如常儀訖就位贊引

引告官以下俱就門外位謁者引告官贊引引執事者

入就位立定奉禮曰再拜贊者承傳告官以下皆再拜

太官令出帥進饌者奉饌陳於西門外告官等入謁者

引諸將俱就門外位告官入訖謁者引諸將入就位立

定奉禮曰再拜大將以下皆再拜謁者進告官之左曰

有司謹具請行事還本位諸祝俱取玉幣於篚各立

罇所謁者引告官詣大社壇升北面以下至奠玉幣酌

飲福受胙如巡狩告社攝事儀初告官詣稷壇贊者引

諸將詣大社壇升西陛進立於大社神坐前南面東上

初諸將升諸祝帥齋郎以爵酌福酒進諸將東西面立

諸將皆再拜受爵跪祭酒啐酒奠爵俛伏與諸祝帥齋

郎進俎減神前胙肉以次授諸將受以授齋郎諸將俱

跪取爵遂飲卒爵太祝帥齋郎受爵復於坵諸將俛伏

興再拜訖謁者引諸將降詣太稷壇飲福受胙如大社

儀訖還本位奉禮曰再拜諸將以下皆再拜謁者引出

初諸將出諸祝各進跪徹豆以下及告官望瘞玉幣至

禮畢如巡狩告社儀若凱旋唯陳俘馘及軍實於北門

南面其告禮如上儀祝版燔於齋所

蕙田案此開元所定命將宜社禮天子親征

宜社禮已見前類帝中彼此互見

明會典洪武三年定天子親征宜于社前期擇日皇帝

服武弁乘革輅用牲犢幣帛作樂行三獻禮其儀同春

秋祭社稷之儀軍將俱飲福于太稷廟

蕙田案諸侯出師有宜社造禰之禮此在周禮王制無文而杜佑通典有之未詳所據今不另列此條

右宜社

禮記王制天子將出征造乎禰注造至也至考廟也

鄭氏鏞曰祭祖曰造蓋特造至而祭之非四時之常享此國內之禮

汪氏克寬曰造造而告之之祭也告于祖禰告以道其事而致其敬也考之王制又曰受命于祖泰誓曰受命于文考此蓋因造告卜于廟受命于祖考而後也

周禮春官大祝掌六祈以同鬼神示二曰造注大師者六軍親征之稱出必

徧祭七廟取遷廟之主而行

大師造于祖則前祝

王氏安石曰司馬法曰將用師乃造于先王所謂造于祖也

蕙田案王制之造但祭考廟周禮之造徧祭

七廟二說互相備

司馬法與甲兵以討不義乃造于先王

唐開元禮皇帝親征告于太廟齋戒將告有司卜日

皇帝清齋及應告官清齋等並如巡狩告儀又諸軍將

各於正寢清齋一宿若在營齋于軍幕諸衛令其屬守廟門工人

俱清齋如常儀陳設前告三日陳設如巡狩告廟儀

又設軍將次於南門外道東西向北上前二日設樂懸

前一日設御座及從駕官位如巡守告廟儀又設軍將

門外道東每等異位重行西向北上設入壘洗大告日

未明十五刻烹牲等並如巡狩告廟儀鑾駕出宮皇

帝服武弁服乘革輅前後備六軍嚴鼓並准大駕餘同

圜丘儀晨裸巡狩告廟同饋食皇帝既升裸下至獻九室

訖降復位並如巡狩告廟儀又皇帝既降謁者引諸軍

將升自東階進立於睿宗大聖至孝皇帝室戶前北面
 西上初軍將升諸太祝各帥齋郎以爵酌鬯福酒進立
 軍將之東西面北上以下至啐奠降復位如類上帝儀
 軍將登作諸祝各入室徹豆還罇所以至燔版于齋坊
 如類上帝儀 鑾駕還宮皇帝既還大次侍中版奏請
 解嚴將士不得擅離部伍皇帝仍武弁乘革輅還宮如常儀
 明會典洪武三年定天子親征造于太廟前期擇日皇
 帝服武弁乘革輅備六軍祭告太廟每廟用牲幣行三
 獻禮其儀皆同時享軍將飲福于皇考之室

右造廟

禮記王制天子將出征禡于所征之地

注禡師祭也為兵禱
 疏案釋天云是禡是禡

師祭也故知禡為師祭也謂之禡者案肆師注云貉讀如十百之百為師祭造軍法者禱氣勢之增倍也其神蓋蚩尤或曰黃帝鄭既云祭造軍法者則是不祭地熊氏以禡為祭地非也

杜氏佑曰禡于所征之地者則兼黃帝蚩尤之神若田狩但祭蚩尤而已

陳氏禮書黃帝與蚩尤戰于阪泉軍法之興始于此故後世祭之

路史史記逸周書大戴禮文所云炎帝赤帝皆謂蚩尤而書傳舉以為榆罔失之

日下舊聞說蚩尤者不一孔子三朝記大戴禮記以為庶人孔氏小司馬氏以為諸侯應劭以為古天子或以為炎帝之後或以為九黎之君或謂殺之于中冀或謂殺之于青邱或謂殺之于凶黎之谷傳聞異辭並存焉可也

詩大雅皇矣是類是禡

朱子詩傳禡至所征之地而祭始造軍法者謂黃帝及蚩尤也

章氏侗曰漢書稱高祖祀黃帝蚩尤于沛廷管仲稱蚩尤作劍戟史記稱黃帝與蚩尤戰于阪泉豈軍法之興始於此故後世祭之歟

爾雅釋天是禡是禡師祭也

注師出征伐禡于所征之地
 祭造兵為軍法者為表以祭之禡周

禮作貉貉又或為貉字古今之異也貉之言百祭祀此神求獲百倍

春秋莊公八年春王正月甲午祠兵 公羊傳祠兵者何出曰祠兵入曰振旅其禮一也皆習戰也

注祠兵祭也左氏作治兵蓋禮

兵不徒使故將出兵必祠于近郊陳兵習戰殺牲饗士卒

邱氏濬曰此經傳言祠兵之始先儒謂何氏解祠兵有二義一則祀其兵器後世祭旗節始此一則殺牲享士卒後世犒賞士卒始此

漢書高祖本紀秦二世元年高祖乃立為沛公祠黃帝祭蚩尤於沛廷而釁鼓旗幟皆赤

郊祀志高祖徇沛為沛公則祀蚩尤釁旗鼓應劭曰蚩尤好五兵故祠祭之求福祥也釁祭也殺牲以血塗鼓曰釁臣瓚曰案禮記及大戴禮有釁廟之禮皆無祭事

蕙田案王制明有禡祭臣瓚以為無祭事謬矣

高祖本紀二年立蚩尤之祀於長安

郊祀志武帝伐南越告禱泰一以牡荆畫幡日月北斗登龍以象太一三星為泰一縫旗命曰靈旗為兵禱則

太史奉以指所伐之國

師古曰以牡荆為幡竿而畫幡為日月龍及星

蕙田案此以太乙為旗神

後漢滕輔祭牙文恭修太牢潔薦遐靈推轂之任實討不庭天道助順正直聰明敬建高牙神武攸託雄戟推鋒龍淵灑鏑

晉顧愷之祭牙文某年某月日錄尚書事豫章公裕敢告黃帝蚩尤五兵之靈兩儀有政四海有王奉命在天世德重光烈烈高牙闐闐伐鼓白氣經天簡揚神武恭行帝罰長殲醜虜維德是依維人是輔

蕙田案此祭黃帝蚩尤五兵

宋鄭鮮之祭牙文潔牲先事薦茲敬祭崇牙既建義鋒增厲人鬼一揆三才同契惟茲靈鑿庶必有察逆順幽辨忠孝顯節凶醜時殲主寧臣悅振旅上京凱

歸西蕃神器增輝四境永安

隋書禮儀志後齊天子親征卜日建牙旗於壇祭以太牢將屆戰所卜剛日備元牲列軍容設柴於辰地為壇而禡祭大司馬奠矢有司奠毛血樂奏大濩之音禮畢徹牲柴燎

開皇二十年太尉晉王廣北伐突厥四月己未次於河上禡祭軒轅黃帝以太牢制幣陳甲兵行三獻之禮大業七年征遼東行幸望海鎮於禿黎山為壇祀黃帝行禡祭詔太常少卿韋霽博士褚亮奏定其禮皇帝及諸預祭臣近侍官諸軍將皆齋一宿有司供帳設位為埋埽神坐西北內壝之外建二旗於南門外以熊席設帝軒轅神坐於壝內置甲冑弓矢於坐側建槊於坐後皇帝出次入門群官定位皆再拜奠禮畢還宮

唐開元禮親征禡于所征之地將祭有司卜日前祭一日皇帝齋於行宮應祭之官齋於祭所近侍之官與從祭群官及諸軍將皆於軍幕齋一宿諸衛令其屬各以其方器服守衛壝門齋一宿尚舍直長施大次及群官軍將等次如類上帝儀又為瘞埽於神座西北內壝之外方深取足容物前一日奉禮設御座東面西向設望瘞位於神座西南當瘞埽北上設諸祭官位於御位東南執事者位於其後俱重行西向北上設御史位一位於神座西南東向一位於神座東南西向設奉禮位於祭官西南贊者二人在南差退俱西向北上又設奉禮贊者位於瘞埽西南上設從祭群官位於祭官之南俱重行西向北上設軍將於南廂重行北向西上設門外位祭官以下皆於東壝之外道南從祭群官位於祭官

之南俱重行北向西上軍將位於南壇外道東重行西
 向北上兵部侍郎建二旗於南門外去門三十步郊社令帥府
 史及齋郎以罇坵壘洗篚幕入設於位犧罇二象罇二
 山壘二皆於神座東南俱北向西上罇皆加勺幕有坵以置爵設御洗又
 於酒罇東南設諸將壘洗又於東南北向設篚幕如常
 中爵篚實以執罇壘者如常設幣篚於酒罇之所祭日未明十
 五刻太官令先備犧牲之饌牲以未明四刻郊社令奉熊
 席入設黃帝軒轅氏神座於壇內近北南向兵部侍郎
 置甲冑弓矢於座側建稍於座後未明二刻郊社令良
 醞令各帥其屬入實罇壘及幣犧罇實以醴齊象罇實以盞齊山壘實以清酒齊皆加明水酒如元
 帥贊者先入就位贊引引御史太祝與執罇壘者入
 當御座前重行北向西上立定奉禮曰再拜贊者承傳

御史以下皆再拜執罇壘者各就位贊引引御史太祝
 行掃訖引就位皇帝服武弁之服詣祭所諸將與從祭
 之官皆戎服陪從如常駕將至謁者引行事之官皆就
 東門外位駕至大次門外下馬之大次郊社令以祝版
 進御如常謁者贊引各引從駕群官及諸將俱就門外
 位謁者贊引各引祭官及從祭群官諸軍將等次入就
 位皇帝停大次半刻頃太常博士引太常卿立於大次
 門外當門北向侍中版奏外辨皇帝出次博士引太常
 卿太常卿引皇帝入門仗衛停於門外近侍者從入如
 常皇帝至版位西向立每立定太常卿與博士退立于左太常卿前奏再拜
 退復位皇帝再拜奉禮曰衆官再拜衆官在位者皆再
 拜太常卿前奏有司謹具請行事退復位太祝跪取幣
 於篚興立於罇所凡取物者皆跪俛伏而取以奠物則奠訖俛伏而後興太常卿引皇帝進

禮記卷六 出師

大

神座前北向立太祝以幣授侍中侍中奉幣東向進皇帝受幣太常卿引皇帝進北向跪奠於神座俛伏興太常卿引皇帝少退北向再拜訖太常卿引皇帝還版位西向立伺眾官拜訖太官令出帥進饌者奉饌陳於東門之外謁者引司徒出詣所司徒奉俎皇帝既復位太官令引饌入太祝迎引設於神座前訖謁者引司徒以下還本位太祝還罇所太常卿引皇帝詣罇洗侍中黃門侍郎贊洗授巾爵並如常儀謁者引司徒進立於罇所齋郎奉俎立於司徒之後皇帝洗爵訖太常卿引皇帝詣罇所執罇罇者舉侍中贊酌醴齊訖太常卿引皇帝進軒轅氏神座前北向跪奠爵俛伏興太常卿引皇帝少退北向立太祝持版進於神座之右東面跪讀祝文文臨時撰訖與皇帝再拜太祝進奠版於神座還罇所太祝

以爵酌罇受福以授侍中受爵西向進皇帝再拜受爵跪祭啐奠爵受胙至還本位如常儀謁者引亞獻上將詣罇洗盥手洗爵酌盞齊奠啐受福如上訖還本位謁者又引次將終獻如亞獻儀太祝進徹豆如式奉禮由賜胙以下至望瘞位禮畢還大次並如常其寘土埽東西各四人若備六軍及嚴鼓作止如類告之禮唐書禮樂志皇帝親征禡於所征之地則為壇再重以熊席祀軒轅氏兵部建兩旗於外壇南門之外陳甲冑弓矢於神位之側植稍於其後尊以犧象山罇各二饌以特牲皇帝服武弁群臣戎服三獻其接神者皆如常祀瘞而不燎

蕙田案以上俱以軒轅為所祭之神

大學衍義補唐節度使辭日賜雙旌雙節立六纛入境

晉書
卷之三
築節樓迎以鼓角宋朝有六纛旌節門旗受賜藏之公
宇私室號節堂朔望次日祭之號衙日蓋有旌節則有
神祀

邱氏濬曰後世六纛之名與祀始見於此

陳子昂禡牙文萬歲通天二年三月朔日清邊道大
總管建安郡王某敢以牲牢告軍牙之神蓋先王作
兵以討有罪姦慝竊命戎夷不龔則必肆諸朝市大
戮原野我皇周子育萬國寵綏百蠻青雲干呂白環
入貢久有年矣契丹凶羯敢亂天常乃蜂聚丸山豕
食遼塞宴安鳩毒作為欃槍天厭其凶國用致討皇
帝命我肅將王誅今大軍已集吉辰叶應旄頭首建
羽旆前列夷貊咸集將士聽誓方俟天休命為人殄
災唯爾有神尚殲乃醜召太一會雷公翼白虎乘青

龍星流彗掃永清朔裔使兵不血刃戎夏大同以昭
我天子之德允乃神之功豈非正直克明哉無縱世
讎以作神羞

唐柳宗元祭纛文惟年月日某官以牲牢之奠祭於
纛神惟昔禮有大特化為巨梓秦人憑神乃建茸頭
是為兵主用以行師漢中蚩尤亦作靈旗既類既禡
指於有罪北面詔盟抗侯以射雖有古典今棄不用
惟茲之制神實守祀有蠢黃孽保固虐人俾茲太平
猶用戎律天子有威威施於下惟守臣某董眾撫師
秉羽元刃出用茲日敢修外事爰薦求牛庶無留行
以殄有罪國有祀典屬於神明傷夷大命無敢私顧
惟克勝敵以全天兵去茲蝨賊達我涵育收厥隸圉
役於校人海隅黎獻永底於理無或頓刃以為神恥

獨孤及祭燾文年月日都統江淮之南節度觀察處
置等使戶部尚書李峘謹以少牢之奠致敬於六燾
之神天地不仁神明無親惟德是與若響之答敢有
象龔滔天構釁稱亂國有明罰神其舍諸賊劉展假
寵多難敢包狼心竊發蠱毒將敷害於上下神祇使
東溟揚波群動昏墊皇帝震怒按劍受鉞命我上將
底天之伐於是虎牙鷹揚之臣虵矛犀渠之群橫行
而東我伐用張月羽雲旗以先啟行方將歷潯陽下
南陵收京口掃建業斲梟獍以釁鼓俘鯨鯢為京觀
俾萬里浪破三象霧廓今以令月吉辰釐駕即路是
用邀福於爾有神敢告無靡旗無絺駮無汰輶無僨
車命五將護野萬靈並轂令天地氛祲望風掃除魑
魅魍魎罔不帥俾莫我敢遏為神祇羞

宋史禮志禡師祭也軍前大旗曰牙師出必祭謂之禡
後魏出師又建燾頭旗上太宗征河東出京前一日遣
右贊善大夫潘慎修出郊用少牢一祭蚩尤禡牙遣著
作佐郎李巨源即北郊望氣壇用香柳枝燈油乳粥酥
蜜餅果祭北方天王

蕙田案此分蚩尤禡牙為二

文獻通考太平興國五年十一月太常禮院言車駕北
征請出宮前一日遣官祭蚩尤及禡牙於地並用少牢
祭北方天王於北郊迎氣壇從之仍遣內侍一人監祭
宋史禮志咸平中詔太常禮院定禡儀所司除地為壇
兩墳繚以青繩張幄帟置軍牙六燾位版版方七寸厚
三分祭用剛日具饌牲用太牢以羊豕代其幣長一丈
八尺軍牙以白六燾以皂都部署初獻副都部署亞獻

置 部署三獻皆戎服清齋一宿將校陪位禮畢焚幣釁鼓
以一牢

蕙田案此不祭蚩尤

遼史景宗本紀乾亨二年十月辛巳將南伐祭旗鼓

聖宗本紀統和六年九月癸卯祭旗鼓

元史憲宗本紀憲宗七年詔諸王出師征宋夏六月謁

太祖行宮祭旗鼓

明會典洪武元年詔定親征遣將諸禮儀以爲古者天子親征則類於上帝造於祖宜於社禡於所征之地祭所過山川若遣將出師亦告於廟社禡祭旗纛而後行於是諸儒議上今牙旗六纛藏之內府其廟在山川壇每歲仲秋祭山川日遣官祭於旗纛廟霜降日又祭於教場至歲暮享太廟日又祭於承天門外俱旗手衛指

揮行禮

禡祭儀一齋戒皇帝清齋一日大將陪祭官以下皆如之一省牲前期二日設皇帝大次於廟庭之東省牲位於南門外前一日導駕官同太常寺導駕詣大次皇帝服通天冠絳紗袍至省牲位廩犧令率其屬牽牲自東西行過御前省訖牽詣神厨太常卿奏請詣神厨視鼎鑊滌溉訖遂烹牲駕還大次一陳設前一日執事設神案於廟殿中之北軍牙位東立纛位西設籩十有二於神位東三行西上豆十有二於神位西三行東上簠簋各二於籩豆間簠東簋西鉶三登三於籩豆前俎三於登鉶前香案於俎前爵坫於香案前沙池於爵坫前設酒尊所於廟庭東幣篚位於酒尊北爵洗位於尊南御洗位於爵洗南瘞坎於神位西北設席於坎位前上置

五音
禮通考卷三十三
酒并椀五雄雞五以俟酌神設御位於廟庭之南正中
北向大將及陪祭官從後異等重行文東武西皆北向
一正祭是日清晨建牙旗六燻於神位後旗東燻西皇
帝服武弁服導駕官同太常卿導皇帝自左南門入就
位贊禮唱迎神大樂作太常卿奏鞠躬樂作奏拜興拜
興平身樂止傳贊同贊禮唱奠幣行初獻禮太常卿奏
請詣盥洗位皇帝至盥洗位搯圭盥帨訖出圭請詣爵
洗位搯圭執爵官以爵進受爵滌爵拭爵訖以授執爵
官再進爵亦如之出圭請詣酒尊所搯圭執爵官以爵
進受爵司尊者舉冪酌醴齊訖以授執爵官再進爵亦
如之出圭請詣軍牙神位前爵幣前行皇帝陞廟壇樂
作至神位前奏跪搯圭三上香奠幣三祭酒奠爵出圭
樂止讀祝官跪讀祝於神右訖太常卿奏俯伏興樂作

奏拜興拜興平身樂止請詣六燻神位前禮同復位亞
獻終獻不奠帛讀祝餘皆如之訖贊禮唱飲福受胙太
常卿奏詣飲福位奏鞠躬樂作奏拜興拜興平身樂止
奏跪搯圭飲福受胙訖出圭奏俯伏興樂作奏拜興拜
興平身樂止復位贊禮唱徹豆樂作掌祭官各徹豆樂
止太常卿奏皇帝飲福受胙免拜贊禮唱陪祭官皆再
拜傳贊訖贊禮唱送神太常卿奏鞠躬樂作奏拜興拜
興平身樂止傳贊同贊禮唱望燎讀祝官取祝捧幣官
取幣掌禮官取饌詣望燎所太常卿奏詣望燎位燎舉
執事殺雞刺血於酒椀中酌神燎半太常卿奏禮畢仍
同導駕官導引還大次內設爵洗位滌爵拭爵上香祭
酒神前再拜賜胙免拜等儀後並省

大政紀 洪武元年十二月庚寅立旗燻廟

明會典旗纛凡各處守禦官俱於公廨後築臺立旗纛廟設軍牙六旗纛神位春祭用驚蟄日秋祭用霜降日祭物用羊一豕一帛一白色祝一香燭酒果先期各官齋戒一日至日守禦長官武服行三獻禮若出師則取旗纛以祭班師則仍置於廟儀注與社稷同但瘞毛血望燎與風雲雷雨等神同仲秋祭儀洪武二十六年定霜降同一齋戒二日一省牲牛一羊一豕一陳設神七位南向旗頭大將六纛大將五方旗神主宰戰船正神金鼓角銃砲之神弓弩飛鎗飛石之神陣前陣後神祇五猖等衆犢一羊一豕一登一釧二邊豆各十簋簋各二帛七黑二白五禮神制帛共設酒尊三爵三酒盞三十筐一於壇東南西向祝文案一於壇西一正祭贊引引獻官至盥洗所盥洗教坊司奏樂典儀唱執事官各

司其事贊引贊就位典儀唱迎神樂作樂止贊引贊四拜陪祭官同典儀唱奠帛行初獻禮奏細樂執事捧帛爵進贊引引獻官詣神位前奠獻訖贊詣讀祝位贊跪樂止讀祝訖奏樂贊俯伏與平身贊復位樂止典儀唱行亞獻禮奏樂執事官捧爵贊引引獻官詣神位前獻訖樂止典儀唱行終獻禮儀同亞獻唱飲福受胙以下如常儀歲暮祭儀一陳設羊一豕一果五爵三帛一朔望日祭旗神儀一陳設羊一豕一無帛一正祭贊引引獻官就位贊四拜贊初獻禮贊跪贊讀祝訖贊俯伏與平身贊亞獻禮贊終獻禮贊四拜贊詣焚祝所訖贊禮畢

明史禮志旗纛之祭有四其一洪武元年禮官奏軍行旗纛所當祭者乃建廟於都督府治之後以都督為獻

官題主曰軍牙之神六燾之神其二歲暮享太廟日祭
旗燾於承天門外其三旗燾廟在山川壇左初旗燾與
太歲諸神合祭於城南九年別建廟每歲仲秋天子躬
祀山川之日遣旗手衛官行禮其正祭旗頭大將六燾
大將五方旗神主宰戰船正神金鼓角銃礮之神弓弩
飛鎗飛石之神陣前陣後神祇五猖等衆凡七位共一
壇南向皇帝服皮弁御奉天殿降香獻官奉以從事祭
物祀先農帛七黑二白五瘞毛血望燎與風雲雷雨諸
神同祭畢設酒器六於地刺雄雞六瀝血以釁之其四
永樂後有神旗之祭專祭火雷之神每月朔望神機營
提督官祭於教場牲用少牢凡旗燾皆藏內府祭則設
之王國祭旗燾則遣武官戎服行禮天下衛所於公署
後立廟以指揮使爲初獻官僚屬爲亞獻終獻儀物殺

京都

大政紀永樂八年二月以親征祓於承天門遣官祭太
歲旗燾等神八月丁未遣官祭旗燾

春明夢餘錄旗燾廟建於太歲殿之東永樂建規制
如南京

明會典世宗嘉靖十八年南巡遣官祭旗燾之神用牲
醴制帛三獻如常儀

蕙田案以上俱祭旗燾

又案禡或云祭黃帝或云祭蚩尤鄭康成概
以爲祭造軍法者似二說皆通矣但明季氏
本謂黃帝聖人蚩尤敢與拒戰逆臣也何得
與于祭其理甚正核而論之當以祭黃帝爲
是隋唐皆專祭黃帝可謂得祀典之正者乃

後世復有變而以旗燾之祭為禡祭者不知其說之何所據太白陰經曰大將軍中營建旗燾天子六軍故用六燾以旄牛尾為之在左驂馬首不言其有祭黃帝出軍訣曰牙旗者將軍之精一軍之形候凡始監牙必祭以剛日亦未嘗以此為禡祭惟晉顧愷之文始以黃帝蚩尤與牙合而為一考史記裴駟集解引皇覽曰蚩尤冢在東平郡壽張縣闕鄉城中高七丈民常十月祀之有赤氣出如匹絳帛民名為蚩尤旗此則其說之所自起歟夫以祭造軍法之人而變而祭牙旗又因旗神而及太乙五兵又或兼祭蚩尤與旗神紛紛之制皆非古也今並列之以備擇又禡有

三出征而禡一也田獵而禡二也無事而禡三也邱瓊山曰至所征之地而既有其祭則無事之時必有其祠可知矣今以無事之禡類附于此而田獵之禡另入田獵一門

右禡

禮記王制

天子將出征受命于祖

注告祖也

蕙田案孔疏謂受命于祖受成于學其禮在類宜造禡之前于經文次序既不合且康成亦無明說疏文並無確據不可從

書泰誓予小子受命文考以爾有眾底天之罰

春秋隱公十一年左氏傳鄭伯將伐許五月甲辰授兵

于大宮

注魯鄭共謀伐許授兵賦車馬也大宮鄭祖廟也蓋授兵車于祖廟也凡出師必告于祖廟而奉遷廟之主以行

蕙田案既已造禡又必受命于祖禮似近於

煩數蓋古人出師必載遷廟之主僅造于禰未得奉遷廟主也禰至親也遷廟主則至尊也出師大事宜臨之以尊不特豐于昵而已又案此諸侯告祖廟禮諸侯禮考之於經不具故不另列

隋書禮儀志皇太子及大將出師則以豕豚一釁鼓告廟受斧鉞訖不得反宿于家開皇八年晉王廣將伐陳內史令李德林攝太尉告于太祖廟

高祖本紀開皇八年冬十月甲子將伐陳有事于太廟命晉王廣秦王俊清河公楊素並為行軍元帥以伐陳十一月丁卯車駕餞師乙亥行幸定城陳師誓衆遼史禮志將出師必先告廟乃立三神主祭之曰先帝曰道路曰軍旅

蕙田案受命于祖之禮後世鮮行之者蓋與造祭混而為一略採一二事以見其概

右受命於祖

禮記王制天子將出征受成于學

注定兵謀也疏受成于學者謂在學謀論兵事好惡可否其

謀成定受此成定之謀在于學裏故云受成于學

蕙田案類宜造禡告廟告學之次第見于王制差為可據而諸家之說參差不一孔叢子問軍禮篇先宜社次受成于學次類上帝隋禮儀志先宜社次類上帝次禡通典載北齊之制先造廟次宜社次類上帝次禡皆與王制不合今一以王制為定司馬法先後之次與王制略同司馬法乃古書班史入之周禮之後可信也

又案受成于學之禮後世亦不行
右受成於學

五禮通考卷第二百三十七

淮陰吳玉搢校字

五禮通考卷第二百三十八

內廷供奉禮部右侍郎金匱秦蕙田編輯 翰林院侍讀學士嘉定王鳴盛

參校

李太保總督直隸右都御史桐城方觀承同訂 兩淮都轉鹽運使德水盧見曾

軍禮六

出師

詩小雅出車王命南仲往城于方出車彭彭旂旒央央

天子命我城彼朔方赫赫南仲玁狁于襄傳王殷王也南仲文王之屬方朔方近玁

狁之國也 玁王使南仲為將率為軍壘以禦北狄之難

采薇序采薇遣戍役也文王之時西有昆夷之患北有

玁狁之患以天子之命將率遣戍役以守衛中國故歌

采薇以遣之

大雅大明維師尚父時維鷹揚涼彼武王傳師太師也鷹揚如鷹之飛揚也涼佐也

尚父呂望也尊稱焉鷹鷺鳥也涼武王者為之上將

江漢序江漢尹吉甫美宣王也

江漢浮浮武夫滔滔匪安匪遊淮夷來求既出我車既設我旗匪安匪舒淮夷來鋪

朱子曰宣王命召虎平淮南之夷由江漢進兵因以起興首章述進兵也

常武序常武召穆公美宣王也

赫赫明明王命卿士南仲大祖大師皇父整我六師以修我戎既敬既戒惠此南國王謂尹氏命程伯休父左右陳行戒我師旅率彼淮浦省此徐土不留不處三事就緒

春秋僖公二十七年左氏傳晉侯蒐于被廬作三軍注闕元年

晉獻公作二軍今復大國之禮謀元帥趙衰曰卻縠可臣亟聞其言矣說禮

樂而敦詩書詩書義之府也禮樂德之則也德義利之

本也君其試之乃使卻縠將中軍卻縠佐之使狐偃將

上軍讓於狐毛而佐之命趙衰為卿讓於欒枝先軫使

欒枝將下軍先軫佐之荀林父御戎魏犢為右

史記司馬穰苴列傳齊使司馬穰苴將兵捍燕晉之師

苴曰臣素卑賤願得君之寵臣國之所尊以監軍景公

使莊賈往苴與賈約日中會於軍門苴先馳至軍立表

下賈素驕貴夕時乃至苴遂斬賈以徇三軍三軍之士

皆股栗

太公兵法凡國有難君避正殿召將詔之曰社稷安

危一在軍令今某國不臣願將軍帥師行之將既受

命乃命太史齋三日太廟鑽靈龜卜吉日以受斧

鉞君入廟門西面而立君親操斧持首授其將以柄

曰從此上至天者將軍制之復操鉞持柄授其將以

刃曰從此下至淵者將軍制之見其虛則進見其實則止勿以三軍為眾而輕敵勿以受命為重而必死勿以身貴而賤人勿以獨見而違眾勿以辨說而必然士未坐勿坐士未食勿食寒暑必同如此士眾必盡死力將已受命拜而報君曰臣聞國不可從外治軍不可從中御二心不可以事君疑志不可以應敵臣既受命專斧鉞之威臣不敢生還願君亦垂一言之命於臣君不許臣臣不敢將君許之乃辭而行軍中不聞君命皆由將出臨敵決戰無有二心若此則戰勝於外功立於內

淮南子兵略訓凡國有難君召將詔之曰社稷之命在將軍今國有難請子將而應之乃令太卜卜吉日君入廟門西面立將入廟門北面立君親操斧鉞授

將乃爪鬣設明衣鑿凶門而出

孔叢子問軍禮天子命將出征親絜齊盛服設奠于祖以詔之大將先入軍吏畢從皆北面再拜稽首而受天子當階南面授之節鉞大將受天子乃東向西面而揖之示勿御也然後告大社冢宰執服宣于社之右南面授大將大將北面稽首再拜而受之承所頒賜於軍吏

漢書高祖本紀元年漢王既至南鄭諸將及士卒皆歌謳思東歸韓信為治粟都尉亦亡去蕭何追還之因薦于漢王曰必欲爭天下非信無可與計事者于是漢王齋戒設壇場拜信為大將軍問以計策

通典魏故事遣將出征符節郎授節鉞跪而推轂

晉書禮志漢魏故事遣將出征符節郎授節鉞于朝堂

其後荀顛等所定新禮遣將御臨軒尚書授節鉞依古兵書跪而推轂之義也

隋書禮儀志周明帝武成元年吐谷渾寇邊帝常服乘馬命大司馬賀蘭祥于太祖之廟司憲奉鉞進授大將大將拜受以授從者禮畢出受甲

開元禮命將出師告于太廟將告有司卜日如別儀前一日諸告官致齋於廟所衛尉設告官以下次各於常所右校掃除內外奉禮設告官版位於內外如常設諸將位於廟庭橫街南道東每等異位重行北面南上又設諸將門外位於南門外道東重行西向北上太廟令整拂神幄又帥其屬以罇坩壘洗篚幕入設皆如常儀告日未明十刻太官令先具牢饌如常其饌每室用牲一太公廟用酒脯醢未明二刻奉禮帥贊者先入就位贊引引御史太祝以下

再拜入行掃除皆如常

自將告以下至此與太公廟儀同

贊引引太廟令太

祝官自東階升入開埒室奉出獻祖以下神主各置於座如常儀各引就位又贊引引告官以次入就位立定

其先拜者不拜太公廟贊引引廟令太祝等入當階間北面西上立定奉禮曰再拜廟令以下皆再拜升自東階入就位立定奉禮曰再拜告官以下皆再拜

官令出帥進饌者奉饌陳于東門外謁者引諸將以下入就位立定奉禮曰再拜諸將以下皆再拜謁者進告

官之左曰有司謹具請行乃還本位諸祝取幣于篚各立于罇所太官令以下至此與太公廟儀同謁者引告官升自東階詣獻祖

室戶前北向立太祝以幣進東向授告官告官受進入室北面跪奠於獻祖座俛伏興出戶北向再拜訖次懿

祖以下並如上儀謁者引還本位祝還罇所太公廟謁者引告官升東階詣太官令

引饌入自正門升太階諸祝迎引於階上各設于神座

太公座前北向立太祝以幣東向授告官告官受進北面跪奠于太公座前俛伏興少退北向再拜訖謁者引告官當留侯座受幣奠亦如之

前訖太官之屬還本位訖太祝各還罇所謁者引告官
盥洗酌獻讀祝文自九室以下及飲福受胙皆如常儀
再拜訖謁者引告官降復位太公廟奠幣訖謁者引告官升自東階爵獻太公及留侯並如常儀告
官飲福將訖謁者引諸將升東階進當皇考睿宗大聖
貞皇帝廟室戶前北面西上初諸將升諸祝帥齋郎以
爵酌福酒詣諸將之東西面北上諸祝帥齋郎進俎減
神前胙肉以次授諸將俱跪取爵遂飲卒爵太祝帥齋
郎受爵復于坵諸將俛伏興再拜訖謁者引諸將降復
位奉禮曰再拜諸將以下皆再拜謁者引出諸祝各進
神座前跪徹豆俛伏興還罇所奉禮曰賜胙贊者唱再
拜在位者俱再拜已飲福受胙者不拜太公廟無諸將拜獻之儀奉禮曰再拜告官以
下皆再拜訖謁者進告官之左白請就望瘞位謁者引
告官就望瘞至禮畢如常儀其置土埽東西各二人太

廟令納神主如常儀祝版燔于齋坊若凱旋唯陳俘馘
及軍實於南門外北面西上其告儀如上
宋政和五禮新儀命將出征儀 受旌節前一日儀鸞
司設大將次於朝堂其日大將常服入就次執事者設
褥位於東上閣門外階下設制誥箱於褥位之前少西
持旌節者少南謁者引大將至就褥位北面立揖東上
閣門官宣有勅大將再拜躬聽口宣訖搢笏謁者二人
持箱進于大將之前大將受訖次少府監執事者交旌
節大將俛伏興再拜搢笏舞蹈又再拜訖出文德殿門
次端禮門入右昇龍門出宣德西偏門大將勒所部兵
衛并偏將裨將各建旗以正行列大將建旗飾以熊虎偏將建旗飾以鳥隼裨將建旗飾以龜蛇
執擎旌節并押節人騎士槍牌步兵樂工等分左右前
導至第 引見其日早大將常服入就殿門外次舍人

禮通考卷三十一 出師

五

引詣殿庭進當殿陛北面立揖躬大將再拜興奏聖躬
 萬福又再拜引大將少前躬致詞歸位再拜西出少頃
 舍人再拜再引大將詣殿庭進當殿陛北向再拜訖引
 至東階揖升殿近御前之左大將奏事稟方略訖降東
 階下殿再拜西出 造廟前期太史擇日太常寺具時
 日散告諸司前告二日儀鸞司設告官以下次於常所
 設大將次於南門之外道東西向前一日質明告官以
 下赴祠所清齋行事執事官並集告官齋所肄儀太祝習
 讀祝文眡禮饌香幣次贊者引監察御史點向西上開
 瘞坎於西階之東北向方深取足容物設望瘞位于瘞
 坎之南告官大將北向監察御史東向奉禮郎太祝西
 向北上又設告官位于東階之東西向又設大將位於
 告官之南西向監察御史位於殿庭之南北向奉禮郎

太祝大官令位於其後西上光祿卿位於監察御史之
 東北向又設監察御史之位於殿上之西東向奉禮郎
 太祝在東西向北上大官令於酒尊所北向告日未明
 大官令帥其屬實饌具畢引光祿卿入定位贊者曰再
 拜光祿卿再拜升自西階凡行事執事官
升降階准此點眡禮饌畢次引監
 察御史升殿點閱陳設糾察不如儀者光祿卿還齋所
 餘官各服祭服引告官大將以下詣東神門外虛揖位
 禮直官贊揖訖贊者引監察御史奉禮郎太祝大官令
 先入就位次引告官并大將各入就位立定祠祭官於
 殿上贊奉神主次引宮闈令入室搢笏於祔室內奉神
 主設於座奉神主詣神幄內於後啟
置設于座以白羅巾覆之執笏退復執事位祠祭官
 於殿上贊奉神主訖禮直官稍前贊有司謹具請行事
 贊者曰再拜在位者皆再拜引監察御史奉禮郎太祝

大官令升就位立定次引告官詣盥洗位北向立搯笏
盥手執笏升詣僖祖室神位前搯笏跪三上香引奉禮
郎搯笏西向跪執事者以幣授奉禮郎奉禮郎即以幣
授告官訖執笏與詣次室以俟告官受幣奉奠訖執笏
俛伏興再拜訖引告官以次詣翼祖宣祖太祖太宗真
宗仁宗英宗神宗哲宗室奉奠並如上儀降復位少頃
引告官再詣盥洗位北向立搯笏盥閱禮饌祝牲克膺
凡告官大將行事禮
直官引餘官贊者引
居還齋所未後一刻大官令帥宰人以鸞
刀引牲遂烹牲脯後有司帥其屬清掃廟之内外告日
前三刻禮直官贊者諸司職掌各服其服贊者先引宮
闈令入詣殿庭北向再拜升殿開室訖太常陳幣篚於
神位之左幣以帛祝版於神位之右置於殿香爐并合置於
案上御封次設祭器藉以席光祿實之每位左十有二邊

為四行以右為上

第一行魚鱸在前糗餌粉餈次之第二行乾榛在前乾棗形盥次之第三行鹿脯在前榛實乾桃次之第四行

稷在前茨栗次之

右十有二豆為四行以左為上

第一行芹菹在前筍菹葵菹次之第二行菁菹

在前韭菹醢食次之第三行魚醢在前兔醢豚拍次之第四行鹿麕在前醢醢食次之

俎二一在邊前

實以羊腥七體兩脾兩肩兩脅

并脊兩髀在兩端兩肩兩脅次之脊在中

一在豆前

實以豕腥七體其載如羊

又俎六在豆右為三重

以北為上

第一重一實以羊腥腸胃肺離肺肺在上端離肺三次腸三胃三又次之一實以豕腥膚九橫載三重一實以羊熟腸胃肺一實以豕熟

膚載如其腥第三重一實以羊熟十一體肩臂膈脰脰正脊一直脊一長脅一短脅一代脅一皆二骨以並肩臂膈在上端脰脰在下端脊脅在中一實以豕熟十

二在胙俎之北

實以羊豕牲首

一在室戶外之

一又俎實以體其載如羊皆羊在左豕在右

左實以毛血

一在邊之左

實以肝骨

一在室戶外之

之後邊豆之間

實以羹加芼滑

一在邊豆外

二俎間盥在

左盥在右

盥實以稻粱梁在稻南盥實以黍稷稷在黍南

設犧牲罇一置於坫加勺幕

置諸戶前楹間北向

實以內法酒

太常設燭於神位前洗二於

東階之東

盥洗在東爵洗在西

壘在洗東加勺篚在洗西南肆實以

中

若爵之篚則又實以爵加坫

執壘篚者在於其後又設虛揖位於齋宮

內道南及東神門外告官大將在南北向監察御史奉
 禮郎太祝大官令在北盥手帨手執笏詣爵洗位北向
 立搢笏洗爵拭爵以爵授執事者執笏升詣僖祖酒尊
 所西向立執事者以爵授執事者執笏詣僖祖神位前
 搢笏跪執事者以爵授告官告官執爵跪三祭酒奠爵
 執笏俛伏興出室戶外北向少立太祝搢笏於室戶外
 之右東向跪讀祝文訖祝文隨時撰述執笏興復位告官再拜
 訖引告官以次詣翼祖宣祖太祖太宗真宗仁宗英宗
 神宗哲宗室酌獻並如上儀降復位禮直官曰賜胙贊
 者曰再拜告官大將以下皆再拜祠祭官於殿上贊奉
 神主入祔室引宮闈令搢笏奉神主入祔室訖宮闈令先捧
 納神主于匱訖
 奉匱入祔室次引告官將詣望瘞位有司詣神位前取
 祝幣置於瘞坎次引監察御史奉禮郎太祝降望瘞位

立定禮直官曰可瘞置土半坎引告官以下復詣東神
 門外虛揖位對立禮直官贊禮畢揖訖退大官令帥其
 屬徹禮饌監察御史升殿監眡收徹訖退宮闈令闔戶
 以降太常藏祝版於匱若凱旋祭告惟陳俘馘及軍實
 於南門之外北面東上其告禮並如上儀

蕙田案造禰受命于祖皆天子親征之祭故
 命將別有告廟之儀非煩瀆也然于經不多
 見惟唐宋特詳明制與唐宋大略多同故從
 略

文獻通考唐開元十九年兩京及天下諸州各置齊太
 公廟上元元年追封為武成王遣將出師則命有司告
 祭以牲牢幣行一獻禮

政和五禮新儀告武成王廟前期太史擇日前告二日

儀鸞司設告官以下次於祠所又設大將次於廟南門之外道東西向前一日質明告官以下赴祠所清齋執事官並集告官齋所肄儀太祝習讀祝文眡禮饌香幣退告日前三刻禮直官贊者諸司職掌各服其服太常陳幣於神位之左幣以白祝版於神位之右置於坫香爐并合置於案上次設祭器藉以席光祿實之每位各左一實以鹿脯豆實以鹿鸞犧尊一置於坫加勺冪於殿堂上前楹間北向實以供內法酒太常設燭於神位前置二洗於東階之東盥洗在東爵洗在西壘在洗東加勺篚在洗西南執壘篚者位於其後開瘞坎於殿後之西北壬北方深取足容物設望瘞位於瘞坎之南告官北向大將位於西東向奉禮郎太祝大官令位於東西向南上設告官位於東階之東西向又設大將位於告官之南

西向奉禮郎太祝大官令位於殿庭之南北向西上又設奉禮郎太祝位於殿上之東西向北上大官令於酒尊所北向告日未明大官令帥其屬實饌具畢告官以下各服祭服贊者引奉禮郎太祝大官令先入就位引告官并大將入就位立定禮直官稍前贊有司謹具請行事贊者曰再拜在位者皆再拜次引奉禮郎太祝大官令升自東階就位次引告官詣盥洗位北向立搢笏盥手帨手執笏升詣神位前搢笏跪三上香次引奉禮郎搢笏西向跪執事者以幣授奉禮郎奉禮郎奉幣授告官訖執笏興復位告官受幣奉奠訖執笏俛伏興再拜降復位少頃引告官再詣盥洗位北向立搢笏盥手帨手執笏詣爵洗位北向立搢笏洗爵拭爵以爵授執事者執笏升詣尊所西向立執事者以爵授告官告官

搢笏執爵執尊者舉冪大官令酌酒告官以爵授執事者執笏詣神位前北向立搢笏跪執事者以酒授告官告官執爵三祭酒奠爵執笏俛伏興少立次引太祝詣神位前東搢笏跪讀祝文訖祝文隨時撰述執笏興復位告官再拜訖降復位次引告官詣望瘞位有司詣神位前取祝幣置於瘞坎引奉禮郎太祝降詣望瘞位禮直官告曰可瘞置土半坎禮直官曰禮畢引告官以下退明集禮遣將皇帝服武弁服御奉天殿授以節鉞就命大將造祖廟具牲幣行一獻禮其宜社告武成王廟亦如之於旗纛廟壇備牲牢幣帛行三獻禮大將為初獻次將為亞獻終獻祭將畢則割雞瀝血於酒以酌神以雞擲於四方

右命將告廟

告武成王廟附

周禮夏官大馭犯輶王自左馭馭下祝登受轡犯輶遂

驅之注行山曰輶犯之者封土為山象以菩芻棘栢為神主既祭之以車轡之而去喻無險難也春秋傳云跋涉山川聘禮曰乃舍輶飲酒于其側禮家

說亦謂道祭

某氏曰輶即祭名故詩云取羝以輶王在車左大馭執轡居中祭則大馭下車祝神王自左執轡駐馬祝畢登車受王轡乃驅

及祭酌僕僕左執轡右祭兩軹祭軌乃飲注軹謂兩轄也軌車前軹也疏此云及

祭酌僕者即上文將犯輶之時當祭左右轂末及軹酌僕者酌酒與僕僕即大馭也大馭左手執轡右手祭兩軹并祭軌祭訖乃飲飲者若祭未飲福乃轡輶而去

戎僕犯輶如玉輅之儀

王氏昭禹曰王以兵出故有犯輶之儀田輅不言犯輶則以戎輅見之

蕙田案大雅生民篇云取羝以輶毛傳云輶

道祭也陸德明釋文云輶蒲末反說文云出

必告道神為壇而祭為輶孔疏輶謂道神之

祭此詩言后稷將行郊祀故祭道神則與出

師無涉即周官大馭及儀禮聘禮所云輶皆

不為行師但征伐乃出行之大者豈輶禮轉
 可廢耶後世隋有此祭見通典隋書開元禮
 則明著為親征而行宋明不聞行此闕之
 觀承案后稷郊天此說最為非禮生民末章
 乃据今日以后稷配天言之耳后稷肇祀句
 則仍收轉第六第七章后稷烝祭輶祭而結
 明以迄於今可以推其功德以配天也疏家
 因上帝居歆之文而謂后稷自行祭帝於郊
 其說必不可存

隋書禮儀志親征將發輶則輶祭其禮有司於國門外
 委土為山象設埋埴有司剝羊陳俎豆駕將至委奠幣
 薦脯醢加羊於輶西首又奠酒解羊并饌埋於埴駕至
 太僕祭兩軹及軌前乃飲受爵遂轆輶上而行

唐開元禮皇帝親征及巡狩郊祭有司輶于國門車駕
 出日右校先於國門外委土為輶輶為山象也又為瘞埴於神
 座西北方深取足容物太祝布神座於輶前南向大官
 令帥宰人剝羊郊社之屬設罇罍篚冪於神座之左俱
 右向置幣於罇所駕將至太祝立於罇洗東南西向祝
 史與執罇罍篚者俱就罇罍所立太祝再拜詣罇所取
 幣進跪奠於神座與還本位進饌薦脯於神座前加羊
 於輶西首太祝詣罍盥手洗爵詣罇所酌酒進跪奠
 於神座前與少退北向立讀祝文訖祝文臨時撰太祝再拜還
 本位少頃太祝帥齋郎幣爵酒饌物宰人舉羊肆解之
 太祝拜載埋埴寘之執罇者徹罍篚席駕至權停太祝
 以爵酌酒授太僕卿左執轡右受酒祭兩軹及軌前軹轂末軌
 前軹轂末軌乃飲受爵而退遂驅駕轆輶上而行

右駟

周禮春官大祝大師國將有事于四望則前祝疏有事于四望謂軍行所

過山川造祭乃過大祝先告王後臨也

肆師封于大神祭兵于山川則為位鄭氏鍔曰封者累土增高非山川之大神則無累土為壇以封崇之禮兵之所必增高以祭之非頓兵之山川則無祭兵之所在則宜有祭此非常祭故皆為之位

書武成告于皇天后土所過名山川傳謂伐紂之時名山華岳大川河

華故知所過名山華岳大川河也周禮大祝云王過大山川則用事焉鄭云用事用祭事行告也

真氏德秀曰王者之師代天致罰非其人得罪于天天理所不容人情所不堪必不輕易以動眾也其始也必以其人所積之惡所犯之罪以告于皇天后土軍旅所至之地所經過之山川皆必致吾所以與師及彼不可不討之意以告于神明苟揆之理反諸身而有一毫利己之私一念忿人之意不合于天不順于人決不敢輕舉焉孟子曰征者正也已必正而後可以正人未有已不正而能正人者也不正之事告之人且不可况神乎神所不可聞者人決不可為也一已為之且不可况役使千萬人而為之乎

唐開元禮皇帝親征及巡狩告所過山川前一日諸告

官俱清齋於告所執事者先脩除告所又為瘞埒當神

座之南如常大官令備牢饌嶽鎮海瀆用大牢中山川用少牢小山川用特牲若行速即用酒脯告

日郊社丞布神座席於告所近北南向設酒罇於神座

之左面右設洗於酒罇東南北向其執罇者位如常奉

禮設告官位於壘洗東南西向執事者位於其後北上

設奉禮位於告官西南東向贊者二人在南少退所司

實罇壘俎豆太祝實幣篚齋郎取豆血幣帛以丈八尺各隨方色奉禮帥

贊者先入就位執罇壘篚者次入就位謁者引告官

以下次入就位立定奉禮曰再拜贊者承傳告官以下

皆再拜謁者進告官之左白有司謹具請行事退復位

奉禮曰再拜告官以下皆再拜太祝以幣授告官告官

受幣謁者引告官詣神座前北面跪奠幣俛伏與少退

再拜告官復位大官丞引饌入太祝迎引設於神座前

大官丞以下還本位謁者引告官詣壘洗盥手洗爵訖
 引告官詣酒罇所執罇者舉罇告官酌酒跪進奠於神
 座俛伏興少退北向立太祝持版進於神座之右東面
 跪讀祝文祝文臨時撰訖與告官再拜太祝進跪奠版於神座
 俛伏興還罇所太祝以爵酌福酒進告官之右西面立
 告官再拜受爵跪祭啐奠爵反受胙以下望瘞等至燔
 版位並如常儀寘土則埽東西各二人
 明會典洪武三年定天子親征祭所過山川有司卜日
 具牲幣皇帝服皮弁行一獻禮

右祭所過山川

周禮地官大司徒施十有二教八曰以誓教恤則民不

怠

注恤謂災危相憂民有凶患憂之則民不解怠黃氏度曰祭祀有誓軍旅有誓恤憂也使憂其事也

史氏浩曰誓所以警戒而歸之恤恤則無慢令致期矣怠何由而生

蕙田案十二教之誓康成及賈公彥皆以為
 凶荒之禮與出師無涉而黃氏史氏諸說解
 為軍中之誓其義兩通今從之

秋官士師以五戒先後刑罰毋使罪麗于民一曰誓用

之于軍旅

注誓于書則甘誓湯誓之屬

鄭氏鏗曰用兵然後有誓誓者折之以言使斷然必信湯誓秦誓作于用兵之時是也王氏昭禹曰誓之所用非特軍旅也祭祀田役之類皆有誓而以軍旅為主

條狼氏凡誓執鞭以趨于前且命之誓僕右曰殺誓馭
 曰車轅誓大夫曰敢不關鞭五百誓師曰三百誓邦之
 大史曰殺小史曰墨注前謂所誓衆之行前也有司讀誓辭則大言其刑以警所誓也誓者謂出軍及祭祀時也出軍之誓誓左右及馭則書之甘誓備矣車轅謂車裂也敢不關謂不關於君也疏誓自有大官若月令田司徒北面以誓之誓時則條狼氏為之大言使衆聞之故云且命之誓僕右者僕太僕與王同車故太僕職云軍旅贊王鼓右謂勇力之士在車右備非常誓馭謂與王馭車者也

王氏安石曰條狼氏主誓者掌辟之官以禁止為事故也

王氏曰鄭氏以為誓者出軍及祭祀之事但為樂師與大史小史主禮樂之事故謂祭祀時耳不知皆誓之于軍也太師職云大師執同律以聽軍聲而詔吉凶是軍有太師也太史職云太史抱天時與太師同車是軍有太史也小史職云凡軍事佐太史是軍有小史也刑不上大夫而誓之嚴如此軍事以嚴終也甘誓可見矣軍國異容祭祀之誓太宰掌之大司徒蒞之何預于條狼氏哉

王氏應電曰士師職以五戒先後刑罰一曰誓用之于軍旅故此所誓專主軍旅而言

蕙田案康成以此誓兼祭祀兩王氏以此誓專主軍中以士師職參考之兩王氏之說為長

訝士凡邦之大事聚眾庶則讀其誓禁

疏大事者謂在國征伐之等聚眾庶非諸侯之事也則訝士讀其誓命之辭及五禁之法也

書大禹謨禹乃會群后誓于師曰濟濟有眾咸聽朕命蠢茲有苗昏迷不恭侮慢自賢反道敗德君子在野小人在位民棄不保天降之咎肆予以爾眾士奉辭伐罪

爾尚一乃心力其克有勳

傳軍旅曰誓濟濟眾盛之貌疏軍旅曰誓曲禮文也穀梁傳曰誥誓不及五帝不及者言于時未有也據此文五帝之世有誓穀梁傳漢初始作不見經文妄言之耳

甘誓大戰于甘乃召六卿王曰嗟六事之人予誓告汝有扈氏威侮五行怠棄三正天用勦絕其命今予惟恭行天之罰

朱升旁訓誓與禹征苗之誓同義言其討叛伐罪之意嚴其坐作進退之節案有扈氏夏同姓之國史記曰故立有扈不服遂滅之

允征維仲康肇位四海允侯命掌六師羲和廢厥職酒荒于厥邑允侯承王命徂征告于眾曰嗟予有眾聖有謨訓明徵定保先王克謹天戒臣人克有常憲百官脩輔厥后惟明明每歲孟春道人以木鐸徇于路官師相規工執藝事以諫其或不恭邦有常刑惟時羲和顛覆厥德沈亂于酒畔官離次俶擾天紀遐棄厥司政典曰先時者殺無赦不及時者殺無赦今予以爾有眾奉將

天罰爾衆士同力王室尚弼予欽承天子威命火炎崑岡玉石俱焚天吏逸德烈于猛火嗚呼其爾衆士懋戒哉

蔡氏沈曰允國名征者上伐下也仲康丁夏之衰羿執國政能命允侯掌六師允侯能承命討有罪禮樂征伐猶自天子出故錄之

湯誓王曰格爾衆庶悉聽朕言非台小子敢行稱亂有夏多罪天命殛之今爾有衆汝曰我后不恤我衆舍我穡事而割正夏予惟聞汝衆言夏氏有罪予畏上帝不敢不正今汝其曰夏罪其如台夏王率遏衆力率割夏邑有衆率怠弗協曰時日曷喪予及汝皆亡夏德若茲今朕必往爾尚輔予一人致天之罰予其大賚汝爾無不信朕不食言爾不從誓言予則孥戮汝罔有攸赦

刑父子兄弟罪不相及今云孥戮汝權以脅之使勿犯疏昭二十年左傳引康誥曰父子兄弟罪不相及權脅之耳不于甘誓解之者以啟承舜禹後刑尚寬殷周以後其罪或相緣坐恐其實有孥戮故于此解之

泰誓惟十有三年春大會于孟津王曰嗟我友邦冢君越我御事庶士明聽誓商王受弗敬上天降災下民皇天震怒命我文考肅將天威大勲未集肆予小子發以爾友邦冢君觀政于商爾尚弼予一人永清四海時哉弗可失 惟戊午王次于河朔群后以師畢會王乃徇師而誓曰嗚呼西土有衆咸聽朕言商王受力行無度穢德彰聞天其以予乂民天視自我民視天聽自我民聽百姓有過在予一人今朕必往 時厥明王乃大巡六師明誓衆士王曰嗚呼我西土君子天有顯道厥類惟彰今商王受狎侮五常荒怠弗敬自絕于天結怨于民上帝弗順祝降時喪爾其孜孜奉予一人恭行天罰古人有言曰撫我則后虐我則仇獨夫受洪惟作威乃汝世讎樹德務滋除惡務本肆予小子誕以爾衆士殄

殲乃讎爾眾士其尚迪果毅以登乃辟功多有厚賞不
迪有顯戮

牧誓時甲子昧爽王朝至于商郊牧野乃誓王左杖黃

鉞右秉白旄以麾曰逖矣西土之人王曰嗟我友邦冢

君御事司徒司馬司空亞旅師氏千夫長百夫長及庸

蜀羗髻微盧彭濮人稱爾戈比爾干立爾矛予其誓王

曰商王受暴虐于百姓以姦宄于商邑今予發惟恭行

天之罰尚桓桓如虎如貔如熊如羆于商郊弗迓克奔

以役西土勗哉夫子爾所弗勗其于爾躬有戮疏武王與紂戰于商郊牧

地之野將戰之時王設言以誓眾

費誓公曰嗟人無譁聽命徂茲淮夷徐戎並興善敕乃

甲冑敵乃干無敢不弔備乃弓矢鍛乃戈矛礪乃鋒刃

無敢不善傳諸侯之事而連帝王孔子序書以魯有治戎征討之備秦有桓過自誓之戒足為世法故錄以備王事猶詩錄商魯之頌又云伯

禽為方伯監七百里內之諸侯帥之以征嘆而勅之使無喧譁欲其靜聽誓命言當善簡汝甲鎧冑兜鍪施汝楯紛無敢不令至攻堅使可用備汝弓矢弓調矢利鍛鍊戈矛磨礪鋒刃皆使無敢不功善

秦誓公曰嗟我士聽無譁予誓告汝群言之首傳誓其群臣通稱士也群

言之首言眾言之本要

蕙田案自三苗誓師以下皆致師之誓秦誓

一篇則還師之誓也孔穎達正義分書之例

為十五曰誓獨秦誓乃誓之變體與周禮所

謂士師五戒之誓司徒十二教之誓皆別

司馬法有虞氏誓于國中欲民體其命也夏后氏誓

于軍中欲民先成其慮也殷誓于軍門之外欲民先

意以待事也周將交刃而誓之以致其志也

文心雕龍雷震始乎曜電出師先乎威聲故觀電而懼雷壯聽聲而懼兵威兵先乎聲其來已久昔帝世戒兵三王誓師宣訓我眾未及敵人也至周穆西征祭公謀父稱古有威讓之令有文告之辭即檄之本源也及春秋征伐自諸侯出懼敵弗服故兵出須名振此威風暴彼昏亂劉獻公之所謂告之以文辭董之

以師武者也齊桓征楚詰包茅之闕晉厲伐秦責箕郤之焚管仲呂相奉辭先
 路詳其意義即今之檄文暨乎戰國始稱為檄檄者噉也宣露于外噉然明白
 也夫兵以定亂莫敢自專天子親戎則稱恭行天罰諸侯御師則云肅將王誅
 故分闡推轂奉辭伐罪非惟致果為毅亦且厲辭為武使聲如衝風所擊氣似
 機槍所掃奮其武怒總其罪人懲其惡稔之時顯其貫盈之數搖奸宄之膽訂
 信慎之心使百尺之衝摧折于咫書萬雉之城顛墜于一檄者也觀隗囂之檄
 亡新布其三逆文不雕飾而辭切事明隴右文士得檄之體矣陳琳之檄豫州
 壯有骨鯁雖奸闖携養章密太甚發邱摸金誣過其虐然抗辭書疊噉然露骨
 矣敢指曹公之鋒幸哉免袁黨之戮也鍾會檄
 蜀徵驗甚明桓公檄胡觀釁尤切並壯筆也

蕙田案劉彥和雖云三代之誓宣訓我眾不
 及敵人然三苗之誓及湯誓泰誓等皆數敵
 罪狀不僅訓我眾也誓辭之體本同於檄又
 或混於露布核而論之檄者致師之際聲罪
 而致討露布者戰勝之後馳詞以揚功今不
 另列移檄一條露布則另列其漢唐以下檄
 辭不備載

右誓師

唐開元禮遣使勞軍將前一日執事者先設使者次於
 營南門之外道右南向使者至謁者引之次使者將到
 兵部先集大將以下於南門之外列左右廂俱重行北
 向相對為首使者出次謁者引立於門西東面持節者
 立於使者之北吏二人持制書案立於使者西南俱東
 面立定大將北面再拜謁者引使者持節者前道入門
 而左持案者從立於幕前南面持節者立於使者之東
 少南西面持案者立於使者西南東面又謁者引大將
 以下入立於使者之南依左右廂俱重行北面相對為
 首立定持節者脫節衣持案者進使者前使者取制書
 持案者退復位使者稱有制大將以下俱再拜宣詔訖
 大將以下又再拜謁者引大將進使者前北面受制書
 退復位持節者加節衣謁者引使者持節者前導以出

置
持案者從之俱復門外位大將以制書授左右拜送使者於門外使者退大將入初使者出諸將以下以次出若賜衣物使者出次立於門外立定執事者以衣物立於案南俱東面北上使者入衣物隨入初大將受制書復位執事者以衣物遍授之大將以下受訖又再拜

右勞師

五禮通考卷第二百三十八

淮陰吳王摺校字

五禮通考卷第二百三十九

內廷供奉禮部右侍郎金匱秦蕙田編輯 翰林院侍讀學士嘉定王鳴盛

參校

李太保總督直隸右都御史桐城方觀承同訂 兩淮都轉鹽運使德水盧見曾

軍禮七

出師

周禮天官太宰作大事則戒于百官贊王命

注謂助王為教令春秋傳曰國

之大事在祀與戎

小宰以法掌祭祀朝覲會同賓客之戒具軍旅亦如之令百官府共其財用治其施舍聽其治訟

春官典瑞牙璋以起軍旅以治兵守

鄭氏鍔曰半圭曰璋長七寸瑑為齒牙之形取牙齒之剛利噬齧兵之象故執以起軍旅若屯兵于外守要害之地有不率紀律者執此以治之李氏嘉會曰牙璋則軍旅之大者用之中璋則軍旅之小者用之

地官大司徒大軍役以旗致萬民而治其徒庶之政令

縣師若將有軍旅田役之戒則受法于司馬以作其衆庶及馬牛車輦使皆備旗鼓兵器以帥而至

夏官諸子掌國子之倅若有兵甲之事則授之車甲合其卒伍以軍法治之注國子謂諸侯卿大夫士之子也

李氏曰王者之師非直與于閭里而又取諸世族彼以父祖富貴宜有報上之心况嘗學德行道藝孰不知忠孝之美任之以金革與夫于賞踊利庸徒鬻賣者蓋有間矣

司右掌群右之政令凡軍旅會同合其車之卒伍而比其乘屬其右

戎右掌戎車之兵革使注謂王使以兵有所誅斬也春秋傳曰戰于殺使萊駒以詔贊王鼓注既告王當鼓之節又助擊之傳王命于

陳中注為王大言之也黃氏曰掌戎車之兵革使蓋戰事也戰重戎右專使事也鄭引左氏萊駒斬囚事其小者耳

虎賁氏掌先後王而趨以卒伍軍旅會同亦如之

旅賁氏掌執戈盾軍旅則介而趨注介被甲王氏曰旅賁則王衛之尤親者王吉服則亦吉服王凶服則亦凶服王戎服則亦戎服亦與王同其憂樂也

太僕凡軍旅贊王鼓注王通鼓佐擊其餘面也疏王通鼓者謂王親將軍衆代王擊乃擊之若鼓人云金鐸通鼓之類也王執路鼓路鼓四面

地官鼓人以鼗鼓鼓軍事注鼗鼓長八尺大鼓謂之鼗疏其長八尺對晉鼓六尺六寸者為大

凡軍旅夜鼓鼗軍動則鼓其衆意鼓軍事以氣盛為壯也魏氏校曰鼓大而短則其聲疾而短聞小而長則其聲舒而遠聞鼗之為言大也因以肅軍令

春官大師大師執同律以聽軍聲而詔吉凶注大師大起軍師兵書曰王者行師出軍之日授將弓矢士卒振旅將張弓大呼大師吹律合音商則戰勝軍士強角則軍擾多變失士心宮則軍和士卒同心徵則將急數怒軍士勞羽則兵弱少威

大史抱天時與大師同車

小史佐大史

右軍中職事

夏官量人營軍之壘舍量其市朝州涂軍社之所重

鄭氏鏐曰營軍之壘舍非徒欲廣狹足以相容又以社主為重所居之處欲其不褻王氏昭禹曰兵法曰善戰致人而不致于人夫我案兵無動而致敵使來以逸待勞宜勝之矣

禮記曲禮行前朱鳥而後元武左青龍而右白虎招搖

在上急繕其怒進退有度左右有局各司其局

此四獸為軍陣象天也急猶堅也繕讀曰勁又畫招搖星于旌旗上以堅勁軍之威怒象天帝也招搖星在北斗杓端主指者度謂伐與步數局部分也疏此明軍行象天文而作陣法也前南後北左東右西朱雀元武青龍白虎四方宿名也軍前宜捷故用雀軍後須殿捍故用元武元武龜也龜有甲能禦侮也左為陽陽能生發象龍變也右為陰陰能殺虎沉殺也軍之左右生殺變應威猛如龍虎也鄭注四獸為軍陣則是陣法但不知何以為之今之軍行畫此四獸于旌旗以標左右前後之軍陣招搖北斗七星北方居四方宿之中以斗末從十二月建而指之則四方宿不差今軍行法之亦作此北斗星在軍中舉之于上以指正四方使四方之陣不差也急繕其怒者軍行既張四宿于四方標招搖于中上象天之行故軍旅士卒起居舉動堅勁奮勇如天帝之威怒也度謂伐與步數牧誓云今日之事不愆于六步七步四伐五伐一擊一刺為一伐也左右有局者局部分也軍之左右各有一部分不相濫也各司其局者軍行須監領故主帥部分各有所司也

蕙田案正義引昭二十一年左傳宋人與華

亥戰云鄭翩願為鶴其御願為鷺又兵書云

善用兵者似率然率然者常山蛇擊其首則

尾至擊其尾則首至擊其中則首尾俱至則

朱鳥等皆是陣法崔靈恩謂軍行所置旌旗

畫此四物其說淺陋非康成意也

觀承案戴禮此條即古八陣法也握機經四

維方而主靜正兵布陣用之四正員而主動

奇兵制勝用之益用後天八卦之位而其天

前衝地後衡則先天之體亦存其中曲禮只

主出行之時故專据龍虎鳥蛇為震兌離坎

四卦員而主動者言之其四維四卦之方而

主靜者不言可知至招搖在上應指大將之

旌麾而言所以行軍布陣指揮兵眾為三軍之司命者也故曰急繕其怒者所以作其氣也若進退有度左右有局各司其局則坐作進退疾徐變化之法俱在其中矣古法無傳握機經是其遺制武侯之八陣亦即根源於此耳豈知熟讀曲禮都已包括而提其綱要也哉

右營陣行列

周禮春官巾車掌王之五路革路龍勒條纓五就建太白以即戎注革路輓之以革而漆之無他飾龍駝也以白黑飾韋雜色為勒之旗猶周大赤蓋象正色也即戎謂兵事疏趙商問巾車職云建大白以即戎司馬職仲秋辨旗物以治兵王載大常下注云凡頒旗物以出軍之旗則如秋不知巾車大白以即戎為在何時答曰旗之正色者或會事或勞師不親將故建先王之正色異于親自將又案司馬法云章夏以日月上明殷以虎上威周以龍上文不用太常者周雖以日月為常以龍為章故郊特牲云龍章而設日月又案周本紀武王遂入至紂所王射之三發而後下車以輕劍斬紂頭懸于太白之旗不

用大常者時未有周禮故武王雖親將猶用太白也

典路凡軍旅以路從注王乘一路典路以其餘路從行亦以華國

夏官戎僕掌馭戎車注戎車革路也師出王乘以自將掌王倅車之政正其

服注倅副也服謂眾乘戎車者之衣服也掌凡戎車之儀注凡戎車眾之兵車也書序武王戎車三百兩也

即三百兩也

鄭氏鐔曰武王戎車三百兩與紂戰于牧野王自將則乘戎路戎僕為之馭正其所衣之服以戎事之服異乎乘車之服乘車之服主于文而戎事以武為主則皆服皮弁國容不可以入軍容當一以戎衣從事不可以不正也

易氏祓曰上文言馭戎車則王之革路此言凡戎車則眾之兵車也武王戎車三百兩其進退之節不愆于六步七步不愆于四伐五伐六伐七伐乃止齊焉則戎車之儀可知大司馬于蒐田之時亦有所謂坐作進退疾徐疏數之節戎僕所以掌其儀者此也

春官車僕掌戎路之萃廣車之萃闕車之萃革車之萃

注萃猶副也此五者皆兵車所謂五戎也戎路王在軍所乘也廣車橫陣之車也闕車所用補闕之車也革猶屏也所用對敵自蔽

輕車之萃注萃猶副也此五者皆兵車所謂五戎也戎路王在軍所乘也廣車橫陣之車也闕車所用補闕之車也革猶屏也所用對敵自蔽

隱之車也輕車所用馳敵致師之車也春秋傳曰公喪戎路又曰其君之戎分為二廣則諸侯戎路廣車也又曰帥旂闕四十乘孫子八陣有革車之陣又曰馳車

凡師共革車各以其萃

注五戎者共其一以為王優尊者所乘也而萃各從其元焉

六韜車者軍之羽翼也所以陷堅陣要強敵遮北走也

王氏昭禹曰凡師共革車則師之所用者其車皆以革鞅之

鄭氏鏐曰革車亦各有萃所以為不可敗之策

禮記曲禮兵車不式

注尚威武不崇敬

武車綏旌

注武車亦革路也取其建武即云兵車取其威

猛即云武車旌謂車上旌也綏謂垂舒

陳氏澔曰兵車革輅也尚勇猛無推讓故不式武車亦革輅也取其建戈刃即云兵車取其威猛即云武車旌車上旌旂也尚威武故舒散若垂綏然

司馬法夏后氏曰鈞車先正也殷曰寅車先疾也周

曰元戎先良也

右車路

周禮春官司常凡軍事建旌旗及致民置旗弊之

注始置旗以致

民民至仆之誅後至者

王氏曰置者植之弊者仆之

鄭氏鏐曰軍旅之事用旌旗以指麾則掌建之始焉置之以致民使來終焉弊之以誅後至皆司常所掌也

禮記曲禮前有水則載青旌前有塵埃則載鳴鳶前有

車馬則載飛鴻前有士師則載虎皮前有摯獸則載貔

注載謂舉旌于首以警眾也禮君行師從卿行旅從前驅舉此則士眾知有所舉各以其類象之首青雀水鳥也鳶鳴則天將風風生埃起鴻取飛有行列也

士師謂兵象也虎取其有威勇貌亦擊獸書曰如虎如貔

司馬法旂夏后氏元人之執也殷白天之義也周黃

地之道也章夏后氏以日月尚明也殷以虎尚威也

周以龍尚文也

右旌旗

周禮夏官司兵掌五兵五盾各辨其物與其等以待軍

事注五盾干櫓之屬等謂功沽上下五兵者戈矛戟盾子夷矛及授兵

從司馬之法以頒之及其受兵輸亦如之注從司馬之法令師旅卒兩人數所用多

少也兵輸謂師還有司還兵也疏受兵從司馬之法者司馬主六軍是一官之長先受于王命知多少乃始出軍故從司馬法以頒之

鄭氏鏐曰物色也各辨其物色使以類相從等者所制之長短小大司兵授之以兵則從司馬之法多乎其數則闕國之守備寡乎其數則乏軍之用器軍之行也從其法而頒之及其還也受其所輸亦當如始者所頒之法苟有亡矢遺鏃之事亦如之矣

軍事建車之五兵會同亦如之

鄭氏鏐曰軍旅之車上必建五兵出先刃入後刃也會同王乘車則亦建焉皆以示威也

司戈盾軍旅授貳車戈盾建乘車之戈盾授旅賁及虎

士戈盾注乘車王所乘車也軍旅則革路疏軍旅貳車貳有車右故授之以戈盾云乘車之戈盾者王所乘車有車右故建戈盾授旅賁氏及虎士

戈盾者衛王故也

及舍設藩盾行則斂之注舍止也藩盾盾可以藩衛者如今之扶蘇歟疏扶蘇舉漢法况之

劉氏晏曰旅賁夾王車左右而虎士趨王車後先舍則守王開則戈與戈盾戒備之尤急者也非其有屏蔽之用乎

司弓矢掌六弓四弩八矢之法凡弩夾庾利攻守唐大

利車戰野戰注攻城壘者與自守者相近弱弩發疾也車戰野戰進退非強則不及

凡矢枉矢絜矢利火射用諸守城車戰殺矢鏃矢用諸

近射注枉矢絜矢二者皆可結火以射敵殺矢言中則死鏃矢象馬二者皆可以射敵之近者

凡師役頒弓弩各以其物從授兵至之儀注物弓弩矢箠之屬

鄭氏鏐曰師役用兵之時會同行禮之時事異禮異故各以其所當用之物而頒之

右兵器

禮記曲禮介冑則有不可犯之色

馬氏曰兵車者以威克愛也以威克愛則服必稱情容必稱服故戎容暨暨介冑有不可犯之色者以此也

介者不拜為其拜而菱拜

朱子曰菱猶言有所枝拄不利屈伸也

少儀乘兵車出先刃入後刃軍尚左卒尚右

陳氏澔曰先刃刃向前也後刃不以刃向國也左陽生道也右陰死道也左將軍為尊其行伍皆尊尚左方欲其無覆敗也士卒之行伍尊尚右方示有必死之志也

軍旅思險隱情以虞

陳氏澔曰軍行舍止經由之處必思為險阻之防又當隱密已情以虞度彼之情計也

王藻戎容暨暨言容諮諮色容厲肅視容清明

司馬法古者軍容不入國國容不入軍軍容入國則民德廢國容入軍則民德弱故在國言文而語溫在朝恭以遜脩已以待人不召不至不問不言難進易退在軍抗而立行遂而果介者不拜兵車不式城上不趨危事不齒故禮與法表裏也文與武左右也春秋僖公三十三年左氏傳春秦師過周北門左右免胄而下超乘者三百乘王孫滿尚幼觀之言于王曰秦師輕而無禮必敗輕則寡謀無禮則脫入險而脫又不能謀能無敗乎

右軍容

書甘誓左不攻于左汝不恭命右不攻于右汝不恭命御非其馬之正汝不恭命

朱氏升曰在車左不治主射之事在車右不治擊刺之事御者居中不得馳驅之正皆不恭命也

牧誓今日之事不愆于六步七步乃止齊焉 不愆于

四伐五伐六伐七伐乃止齊焉 尚桓桓如虎如貔如

熊如羆于商郊弗迓克奔以役西土

傳戰事就敵不過六步七步乃止相齊言當旅進一

司馬法逐奔不過百步縱綏不過三舍

家語工尹商陽與陳棄疾追吳師及之陳棄疾謂工

尹商陽曰王事也子手弓而可手弓子射諸射之斃

一人韞弓又及謂之又斃二人每斃一人揜其目止

其御曰朝不坐燕不與殺三人亦足以反命矣孔子

曰殺人之中又有禮焉子路怫然進曰人臣之節當

君大事唯力所及死而後已夫子何善此子曰然如汝言也吾取其有不忍殺人之心而已

蕙田案此事亦見檀弓

荀子王者之軍制將死鼓御死轡百吏死職士大夫死行列聞鼓聲而進聞金聲而退順命為上有功次之令不進而進猶令不退而退也其罪唯均不殺老弱不獵禾稼服者不禽格者不舍犇命者不獲凡誅非誅其百姓也誅其亂百姓者也百姓有扞其賊則是亦賊也以故順刃者生蘇刃者死犇命者貢王者有誅而無戰城守不攻兵革不擊上下相喜則慶之不屠城不潛軍不留眾師不越時故亂者樂其政不安其上欲其至也

右坐作進退擊刺之節

周禮秋官鄉士大軍旅則各掌其鄉之禁令帥其屬夾道而蹕

士師掌國之五禁之法以左右刑罰五曰軍禁注古之禁書七矣今軍有

囂謹夜行之禁

夏官小子凡師田斬牲以左右狗陳注示犯誓必殺之

銜枚氏軍旅令銜枚禁詔呼歎鳴于國中者

書費誓今惟淫舍牯牛馬杜乃獲斂乃甯無敢傷牯牯

之傷汝則有常刑 馬牛其風臣妾逋逃勿敢越逐祗

復之我商賚汝乃越逐不復汝則有常刑無敢寇攘踰

垣墻竊牛馬誘臣妾汝則有常刑 甲戌我惟征徐戎

峙乃糗糧無敢不逮汝則有大刑魯人三郊三遂峙乃

楨幹甲戌我惟築無敢不供汝則有無餘刑非殺魯人

三郊三遂峙乃芻茭無敢不多汝則有大刑

呂氏曰先治戎備次之以除道路又次之以嚴部伍又次之以立期會先後之序皆不可紊

司馬法冢宰與百官布令於軍曰入罪人之地無暴

神祇無行田獵無毀土功無燔墻屋無伐林木無取六畜禾黍器械見其老幼奉歸勿傷雖遇壯者不校勿敵敵若傷之醫藥歸之

右軍中禁令

周禮夏官大司馬及戰巡陳旻事而賞罰

秋官大司寇大軍旅涖戮于社注社謂社主在軍者鄭司農曰書曰用命賞于祖不用命戮于社

小司寇小師涖戮注小師王不自出之師

王氏昭馬曰大司寇大軍旅涖戮故小司寇小師涖戮

鄉士大軍旅則各掌其鄉之禁令凡國有大事則戮其

犯命者疏大事謂征伐故有犯命刑戮之事

士師大師帥其屬而禁逆軍旅者與犯師禁者而戮之

注逆軍旅反將命也犯師禁于行陣也

鄭氏鐸曰王師所過而敢有沮遏或所須而有不從令者軍中之禁而輒敢干犯則不循軍法之人也安可不戮耶晉魏絳將與狄人戰于太原荀吳之嬖人

不肯即卒則斬之雞澤之盟晉侯之弟揚于亂行于曲梁魏絳戮其僕正謂是也

易氏後曰帥其屬而行其戮所以正軍旅之法凡此皆以刑官之士師任其職重其事也

書甘誓用命賞于祖不用命戮于社傳天子親征必載遷廟之祖主行有功則賞祖主前示不

專又載社主謂之社事不用命奔北者則戮之于社主前社主陰陰主殺親祖嚴社之義疏曾子問云孔子曰天子巡狩以遷廟之主行載之于齋車言必有尊

也巡狩尚然征伐必也定四年左傳又云君以軍行後社鼙鼓祝奉以從是天子親征又載社主之事也郊特牲云惟為社事單出里故以社事言之所以刑賞異

處者社主陰陰主殺祖主陽陽主生禮左宗廟右社稷是祖陽社陰就祖賞就社殺親祖嚴社之義也

司馬法賞不踰時欲民速得為善之利也罰不遷列

欲民速覩為不善之害也

孔叢子問軍禮有司簡功行賞不稽于時其用命者

則加爵受賜于祖奠之前其奔北犯令者則戮于社

主之前信陵君問于子高曰古者軍旅賞人必于祖

戮人必于社其義何也答曰賞功于祖告分之均示

不敢專也戮罪于社告中于土示聽之當也

子路問於孔子曰臧武仲率師與邾人戰于狐鮑遇敗焉師人多喪而无罰古之道然與孔子曰凡謀人之軍師敗則死之謀人之國邑危則亡之古之正也其君在焉者有詔則無討

右軍中刑賞

禮記曾子問曾子問曰古者師行必以遷廟主行乎孔子曰天子巡狩以遷廟主行載于齊車言必有尊也今也取七廟之主以行則失之矣當七廟五廟無虛主虛主者唯天子崩諸侯薨與去其國與祫祭于祖為無主耳曾子問曰古者師行無遷主則何主孔子曰主命問曰何謂也孔子曰天子諸侯將出必以幣帛皮圭告于祖禰遂奉以出載于齊車以行每舍奠焉而後就舍反必告設奠卒斂幣玉藏諸兩階之間乃出蓋貴命也

東氏澔曰既以幣玉告于祖廟則奉此幣玉猶奉祖宗之命也故曰主命每舍必奠神之也反則設奠以告而埋藏之不敢褻也

真氏德秀曰先儒謂廟無虛主有廟者不可以其主

行主命謂雖無木主但所受于神之命即是主也

吳氏澂曰遷廟主謂禘祫時所遷昭穆最上之廟一主也在昭廟穆廟之上最尊最親者也君將出行時禘告有廟之諸主又特告此無廟之一主而載之以行也

周禮春官小宗伯若大師則帥有司而立軍社奉主車

鄭氏鏐曰古者大師則先有事于社與廟然後載社主與遷廟之主以行不用命戮于社故載社主將以行戮用命賞于祖故載遷廟之主將以行賞小宗伯掌社稷宗廟之禮宜載以行乃言立者蓋社本不在軍因用師始立之立者出于一時之故廟主為尊載之以行不敢忽也故言奉奉以言其肅欽之至帥有司者蓋帥大祝也大祝職曰大師宜于社造于祖設軍社國將有事于四望及軍歸獻于社則前祝故知此所謂有司為大祝明矣

肆師凡師甸用牲于社宗則為位

易氏祔曰用師者必載社之石主祖之木主示有所受命
鄭氏鏐曰夫甸獵之甸乃四時蒐苗獮狩之田師甸則大用師以對敵之時何以明之以所祭之神知之用師則載社主與遷廟之主以行此用牲于社宗大戰則類造于上帝封于大神祭兵于山川此有類造封祭之事豈四時之甸所宜有耶故知以師甸言社者主也宗者遷廟之主不曰祖曰宗者宗總祖者也載主而行不在國之常位而祭不可以無位無位則鬼神無所依故為位然後祭小宗伯于軍旅甸後禱祠為位則止為位于肆儀之時肆師于用牲以祭時

則為位者蓋所掌者立祀用牲之禮故也

周禮春官大祝大師設軍社則前祝

注鄭司農說設軍社以春秋傳曰所謂君以師行後

社釁鼓祝奉以從者也疏軍將出祭于社即將社主行不用命戮于社出必七廟俱祭取遷廟之主行用命賞于祖皆載于齋車社在軍中故云設軍社

王氏安石曰詩云乃立冢土戎醜攸行所謂設軍社也

鄭氏鏐曰大師必載社主與遷廟之主以行及軍之所在則必設軍中之社于其地此國外之禮小宗伯所謂帥有司而立軍社是也

小祝大師掌釁祈號令

王氏昭禹曰蓋軍行殺牲以血釁鼓以禦沃釁求其所斷焉故謂之釁祈小祝則號致焉而後祝耳

鄭氏鏐曰後社釁鼓以除去不祥祈軍有功大祝掌宜社造祖之事小祝掌其釁祈之祝號

王氏曰大師掌釁祈號祝則左傳所謂軍行後社釁鼓祝奉以從

春秋定公四年左氏傳衛祝佗子魚曰君以軍行後社

釁鼓祝奉以從

真氏德秀曰古禮天子親征必奉廟主社主從軍而行有功則賞于廟主前不用命則戮于社主前示不專也

孔叢子問軍禮天子出征命有司以特牲告社告以

所征之事而受命焉以齋車載遷廟之主及社主行

大司馬職奉之無遷廟主則以幣帛皮圭告于祖禰

謂之主命亦載齋車凡行主皮圭幣帛皆每舍奠焉

而後就館主車止于中門之外外門之內廟主居于

道左社主居于道右

周禮春官小宗伯若軍將有事則與祭有司將事于四

望注軍將有事將與敵合戰也與祭有司謂大祝之屬蓋司馬之官實典焉

王氏曰先王雖以至仁伐至不仁然君子臨事而懼故有事于祭焉

鄭氏鏐曰軍將有事則與祭者主帥奉祭小宗伯以職當立之奉之故當與也小宗伯已與祭于軍中則四望之祭必遣其所屬之有司往行事焉理之宜也

戰必禱于神欲氣勢之增倍四望又山川之尤大者國家所賴以為阻固是以將戰則禱焉欲其為兵之捍蔽

孔叢子問軍禮及至敵所將戰太史卜戰日卜右御

先期三日有司明以敵人罪狀告之史史定誓命戰

日將帥陳列車甲卒伍于軍門之前有司讀誥誓使

周定三令五申既畢遂禱戰祈克于上帝然後即敵將士戰全已克敵史擇吉日復禡于所征之地柴于上帝祭社奠祖以告克者不頓兵傷士也戰不克則不告也

右軍中之祭

周禮夏官環人掌致師

注致師者致其必戰之志古者將戰先使勇力之士犯敵焉疏古者將戰先使勇力之士犯敵焉

敵焉者案文十二年秦伯伐晉秦人欲戰秦伯謂士會曰若何而戰對曰若使輕者肆焉其可注云肆突言使輕銳之兵往驅突晉軍隱九年北戎侵鄭公子突曰使勇而無剛者嘗寇而速去之注云勇則能往無剛不耻退揚軍旅注為之威武以觀敵

鄭氏鏗曰戰必致師蓋使環人犯敵以致吾必戰之志使敵人怒而求戰其致之自吾也

王氏昭禹曰兵法曰善戰者致人而不致于人夫我按兵無動而致敵使來以逸待勞宜勝之矣

春秋宣公十二年左氏傳楚許伯御樂伯攝叔為右以致晉師許伯曰吾聞致師者御靡旌摩壘而還樂伯曰吾聞致師者左射以敢代御執轡御下兩馬掉鞅而還

攝叔曰吾聞致師者右入壘折馘執俘而還皆行其所聞而復

右致師

春秋隱公二年十有二月鄭人伐衛 四年春王二月莒人伐杞取牟婁夏宋公陳侯蔡人衛人伐鄭秋翬帥師會宋公陳侯蔡人衛人伐鄭 五年秋九月邾人鄭人伐宋冬十有二月宋人伐鄭圍長葛 七年秋公伐邾冬戎伐凡伯于楚邱以歸 十年夏翬帥師會齊人鄭人伐宋秋宋人蔡人衛人伐戴鄭伯伐取之 桓公五年秋蔡人衛人陳人從王伐鄭 十二年十有二月及鄭師伐宋丁未戰于宋 十四年冬十有二月宋人以齊人蔡人衛人陳人伐鄭 十五年冬十有一月公會宋公衛侯陳侯于袤伐鄭 十六年夏四月公

會宋公衛侯陳侯蔡侯伐鄭

莊公二年夏公子慶父帥師伐於餘邱 三年春王正

月溺會齊師伐衛 五年冬公會齊人宋人陳人蔡人

伐衛 九年夏公伐齊納子糾 十四年春齊人陳人

曹人伐宋夏單伯會伐宋 十五年秋宋人齊人邾人

伐邾 十六年夏宋人齊人衛人伐鄭秋荆伐鄭 十

九年冬齊人宋人陳人伐我西鄙 二十年冬齊人伐

戎 二十六年春公伐戎秋公會宋人齊人伐徐 二

十八年春王三月甲寅齊人伐衛秋荆伐鄭 三十年

冬齊人伐山戎 三十二年冬狄伐邢

僖公元年秋七月楚人伐鄭 三年冬楚人伐鄭 四

年春王正月遂伐楚次于陘秋及江人黃人伐陳 六

年夏公會齊侯宋公陳侯衛侯曹伯伐鄭圍新城 七

年春齊人伐鄭 八年夏狄伐晉 十年夏齊侯許男

伐北戎 十一年冬楚人伐黃 十五年秋七月齊師

曹師伐厲冬宋人伐曹 十七年春齊人徐人伐英氏

十八年春王正月宋公曹伯衛人邾人伐齊冬邢人

狄人伐衛 十九年秋衛人伐邢 二十年冬楚人伐

隨 二十一年秋宋公楚子陳侯蔡侯鄭伯許男曹伯

會于孟執宋公以伐宋冬公伐邾 二十二年春公伐

邾取須句夏宋公衛侯許男滕子伐鄭 二十三年春

齊侯伐宋圍緡秋楚人伐陳 二十四年夏狄伐鄭

二十六年夏齊人伐我北鄙衛人伐齊冬楚人伐宋圍

緡公以楚師伐齊取穀 二十八年春晉侯伐衛 三

十三年夏公伐邾取雩婁秋公子遂帥師伐邾冬晉人

陳人鄭人伐許

文公元年夏晉侯伐衛衛人伐晉 二年冬晉人宋人
 陳人鄭人伐秦 三年春王正月叔孫得臣會晉人宋
 人陳人衛人鄭人伐沈沈潰夏秦人伐晉冬晉陽處父
 帥師伐楚以救江 四年秋晉侯伐秦 七年春公伐
 邾冬徐伐莒 九年三月楚人伐鄭 十年夏秦伐晉
 十一年春楚子伐麋 十四年春邾人伐我南鄙叔彭
 生帥師伐邾 十五年六月晉卻缺帥師伐蔡戊申入
 蔡十有二月齊侯遂伐曹入其郛 十七年春晉人衛
 人陳人鄭人伐宋夏齊侯伐我西鄙
 宣公元年秋宋公陳侯衛侯曹伯會晉師于棊林伐鄭
 冬晉人宋人伐鄭 二年春秦師伐晉 三年春楚子
 伐陸渾之戎 四年春王正月公伐莒取向冬楚子伐
 鄭 五年冬楚人伐鄭 七年夏公會齊侯伐萊 八

年夏晉師白狄伐秦冬楚師伐陳 九年夏齊侯伐萊
 秋九月晉荀林父帥師伐陳冬楚子伐鄭 十年六月
 宋師伐滕晉人宋人衛人曹人伐鄭秋公孫歸父帥師
 伐邾取繹冬楚子伐鄭 十一年夏公孫歸父會齊人
 伐莒 十二年冬宋師伐陳 十三年春齊師伐莒夏
 楚子伐宋 十四年夏晉侯伐鄭 十五年夏秦人伐
 晉 十八年春晉侯衛世子臧伐齊公伐杞
 成公二年春齊侯伐我北鄙 三年春王正月公會晉
 侯宋公衛侯曹伯伐鄭夏鄭公子去疾帥師伐許秋晉
 郤克衛孫良夫伐廐咎如冬鄭伐許 四年冬鄭伯伐
 許秋楚公子嬰齊帥師伐鄭 七年春吳伐邾秋楚公
 子嬰齊帥師伐鄭 八年冬叔孫僑如會晉士燮齊人
 邾人伐邾 九年秋晉欒書帥師伐鄭冬十有一月楚

公子嬰齊帥師伐莒庚申莒潰秦人白狄伐晉 十年
 五月公會晉侯齊侯宋公衛侯曹伯伐鄭 十三年夏
 五月公自京師遂會晉侯齊侯宋公衛侯鄭伯曹伯邾
 人滕人伐秦 十四年秋鄭公子喜帥師伐許 十五
 年夏楚子伐鄭 十六年秋公會尹子晉侯齊國佐邾
 人伐鄭 十七年夏公會尹子單子晉侯齊侯宋公衛
 侯曹伯邾人伐鄭冬公會單子晉侯宋公衛侯曹伯齊
 人邾人伐鄭 十八年夏楚子鄭伯伐宋
 襄公元年夏晉韓厥帥師伐鄭 二年春鄭師伐宋
 三年春楚公子嬰齊帥師伐吳冬晉荀罃帥師伐許
 五年冬楚公子貞帥師伐陳 八年秋莒人伐我東鄙
 冬楚公子貞帥師伐鄭 九年冬公會晉侯宋公衛侯
 曹伯莒子邾子滕子薛伯杞伯小邾子齊世子光伐鄭

十年夏楚公子貞鄭公孫輒帥師伐宋晉師伐秦秋
 莒人伐我東鄙公會晉侯宋公衛侯曹伯莒子邾子齊
 世子光滕子薛伯杞伯小邾子伐鄭 十一年夏公會
 晉侯宋公衛侯曹伯齊世子光莒子邾子滕子薛伯杞
 伯小邾子伐鄭秋楚子鄭伯伐宋公會晉侯宋公衛侯
 曹伯齊世子光莒子邾子滕子薛伯杞伯小邾子伐鄭
 冬秦人伐晉 十二年春王二月莒人伐我東鄙圍台
 十四年夏四月叔孫豹會晉荀偃齊人宋人衛北宮
 括鄭公孫蠆曹人莒人邾人滕人薛人杞人小邾人伐
 秦秋楚公子貞帥師伐吳 十五年夏齊侯伐我北鄙
 圍成秋邾人伐我南鄙 十六年春齊侯伐我北鄙夏
 五月叔老會鄭伯晉荀偃衛甯殖宋人伐許秋齊侯伐
 我北鄙圍郟 十七年春宋人伐陳夏衛石買帥師伐

曹秋齊侯伐我北鄙圍桃高厚帥師伐我北鄙圍防冬
 邾人伐我南鄙 十八年秋齊師伐我北鄙冬楚公子
 午帥師伐鄭 十九年夏衛孫林父帥師伐齊 二十
 年秋仲孫速帥師伐邾 二十三年秋齊侯伐衛遂伐
 晉 二十四年夏楚子伐吳秋七月齊崔杼帥師伐莒
 冬楚子蔡侯陳侯許男伐鄭 二十五年春齊崔杼帥
 師伐我北鄙冬鄭公孫夏帥師伐陳十有二月吳子遏
 伐楚門于巢卒 二十六年冬楚子蔡侯陳侯伐鄭
 昭公四年秋七月楚子蔡侯陳侯許男頓子胡子沈子
 淮夷伐吳 五年冬楚子蔡侯陳侯許男頓子沈子徐
 人越人伐吳 六年秋楚遠罷帥師伐吳冬齊侯伐北
 燕 十年秋七月季孫意如叔弓仲孫矍帥師伐莒
 十二年冬楚子伐徐晉伐鮮虞 十五年秋晉荀吳帥

師伐鮮虞 十六年春晉侯伐徐 十九年春宋公伐
 邾秋齊高發帥師伐莒 二十二年春齊侯伐莒 三
 十二年夏吳伐越
 定公四年秋晉士鞅衛孔圉帥師伐鮮虞 七年秋齊
 國夏帥師伐我西鄙 八年夏齊國夏帥師伐我西鄙
 十二年夏衛公孟彊帥師伐曹 十三年夏衛公孟
 彊帥師伐曹 十五年夏鄭罕達帥師伐宋
 哀公元年秋齊侯衛侯伐宋冬仲孫何忌帥師伐邾
 三年夏宋樂髡帥師伐曹 五年夏齊侯伐宋晉趙鞅
 帥師伐衛 六年春晉趙鞅帥師伐鮮虞吳伐陳冬仲
 孫何忌帥師伐邾宋向巢帥師伐曹 七年秋公伐邾
 八年春吳伐我 九年夏楚人伐陳秋宋公伐鄭
 十年春公會吳伐齊夏宋人伐鄭冬楚公子結帥師伐

陳十二年秋宋向巢帥師伐鄭 十三年夏楚公子申帥師伐陳

蕙田案以上伐聲罪致討曰伐左氏傳曰有鐘鼓曰伐

莊公十年二月公侵宋 十五年秋鄭人侵宋 二十四年冬戎侵曹 二十九年夏鄭人侵宋

僖公二年冬十月楚人侵鄭 四年春王正月公會齊侯宋公陳侯衛侯鄭伯許男曹伯侵蔡蔡潰冬十有二月公孫茲帥師會齊人宋人衛人鄭人許人曹人侵陳

十三年春狄侵衛 十四年秋狄侵鄭 二十一年春狄侵衛 二十六年春齊人侵我西鄙 二十八年春晉侯侵曹 三十年夏狄侵齊秋介人侵蕭 三十二年夏衛人侵狄 三十三年夏狄侵齊

文公四年夏狄侵齊 七年夏狄侵我西鄙 九年夏狄侵齊 十年冬狄侵宋 十一年秋狄侵齊 十三年冬狄侵衛 十五年夏齊人侵我西鄙十二月齊侯侵我西鄙

宣公元年秋楚子鄭人侵陳遂侵宋冬晉趙穿帥師侵崇 二年夏晉人宋人衛人陳人侵鄭 三年夏楚人侵鄭秋赤狄侵齊 四年夏赤狄侵齊 六年春晉趙盾衛孫免侵陳

成公二年冬楚子鄭師侵衛 六年春衛孫良夫帥師侵宋秋仲孫蔑叔孫僑如帥師侵宋 八年春晉欒書帥師侵蔡 十年春衛侯之弟黑背帥師侵鄭 十六年夏四月鄭公子喜帥師侵宋 十七年春衛北宮括帥師侵鄭 十八年冬楚人鄭人侵宋

襄公元年秋楚公子壬夫帥師侵宋 二年夏晉師宋
師衛甯殖侵鄭 八年夏鄭人侵蔡獲蔡公子燮 十
一年夏鄭公孫舍之帥師侵宋 十二年冬楚公子貞
帥師侵宋 十四年夏莒人侵我東鄙 十九年秋七
月晉士句帥師侵齊聞齊侯卒乃還 二十四年春仲
孫羯帥師侵齊

定公四年三月公會劉子晉侯宋公蔡侯衛侯陳子鄭
伯許男曹伯莒子邾子頓子胡子滕子薛伯杞伯小邾
子齊國夏于召陵侵楚 六年二月公侵鄭 七年秋
齊人執衛行人北宮結以侵衛 八年春王正月公侵
齊二月公侵齊秋七月晉士鞅帥師侵鄭遂侵衛九月
季孫斯仲孫何忌帥師侵衛
哀公七年春宋皇瑗帥師侵鄭晉魏曼多帥師侵衛

十年夏晉趙鞅帥師侵齊 十三年秋魏曼多帥師侵
衛

蕙田案以上侵潛師掠境曰侵左氏傳曰無
鐘鼓曰侵胡傳曰先儒謂無名行師曰侵然
考諸五經皆稱侵伐在易謙之六五曰利用
侵伐征不服也書泰誓曰我武惟揚侵于之
疆詩皇矣曰依其在京侵自阮疆周官大司
馬九伐之法曰賊賢害民則伐之負固不服
則侵之而以爲無名行師可乎蓋聲罪者鳴
鐘擊鼓整衆而行兵法所謂正也潛師者銜
枚卧鼓出人不意兵法所謂奇也

桓公十年冬十有二月丙午齊侯衛侯鄭伯來戰于郎
十二年十有二月丁未戰于宋 十三年春二月公

會紀侯鄭伯己巳及齊侯宋公衛侯燕人戰齊師宋師
 衛師燕師敗績 十七年夏五月丙午及齊師戰于奚
 莊公九年八月庚申及齊師戰于乾時我師敗績 二
 十八年春王正月衛人及齊人戰衛人敗績
 僖公十五年十有一月壬戌晉侯及秦伯戰于韓獲晉
 侯 十八年五月戊寅宋師及齊師戰于甌齊師敗績
 二十二年秋八月丁未及邾人戰于升陘冬十有一
 月己巳朔宋公及楚人戰于泓宋師敗績 二十八年
 夏四月己巳晉侯齊師宋師秦師及楚人戰于城濮楚
 師敗績
 文公二年春王二月甲子晉侯及秦師戰于彭衙秦師
 敗績 七年夏四月戊子晉人及秦人戰于令狐 十
 二年冬十有二月戊午晉人秦人戰于河曲

宣公二年春王二月壬子宋華元帥師及鄭公子歸生
 帥師戰于大棘宋師敗績獲宋華元 十二年夏六月
 乙卯晉荀林父帥師及楚子戰于泌晉師敗績
 成公二年夏四月丙戌衛孫良夫帥師及齊師戰于新
 築衛師敗績六月癸酉季孫行父臧孫許叔孫僑如公
 孫嬰齊帥師會晉郤克衛孫良夫曹公子首及齊侯戰
 于鞌齊師敗績 十六年夏六月甲午晦晉侯及楚子
 鄭伯戰于鄢陵楚子鄭師敗績
 昭公十七年冬楚人及吳戰于長岸
 定公四年冬十有一月庚午蔡侯以吳子及楚人戰于
 柘舉楚師敗績
 哀公二年秋八月甲戌晉趙鞅帥師及鄭罕達帥師戰
 于鐵鄭師敗績

蕙田案以上戰左氏傳曰皆陳曰戰大崩曰敗績

隱公十年六月壬戌公敗宋師于菅

莊公十年春王正月公敗齊師于長勺夏六月公敗宋師于乘邱秋九月荆敗蔡師于莘以蔡侯獻舞歸 十一年夏五月戊寅公敗宋師于鄆

僖公元年九月公敗邾師于偃冬十月壬午公子友帥師敗莒師于鄆獲莒挈 十五年冬楚人敗徐于婁林

三十三年夏四月辛巳晉人及姜戎敗秦師于殽秋晉人敗狄于箕

文公十一年冬十月甲午叔孫得臣敗狄于鹹 成公十二年秋晉人敗狄于交剛

昭公元年六月晉荀吳帥師敗狄于大鹵 四年秋七

月戊辰叔弓帥師敗莒師于蚡泉 二十三年七月戊辰吳敗頓胡沈蔡陳許之師于雞父胡子髡沈子逞滅獲陳夏齧

定公十四年五月於越敗吳于檇李 蕙田案以上敗左氏傳曰凡師敵未陳曰敗

某師

哀公九年春宋皇瑗帥師取鄭師于雍邱 十三年春鄭罕達帥師取宋師于岳

蕙田案以上取左氏傳曰覆而敗之曰取某師

襄公二十三年冬齊侯襲莒

蕙田案以上襲左氏傳曰輕曰襲杜氏謂掩其不備也

莊公三年冬公次于滑 八年春王正月師次于郎以
俟陳人蔡人 十年夏六月齊師宋師次于郎 十五
年三月遂次于匡

文公十年冬楚子蔡侯次于厥貉

襄公元年夏仲孫蔑會齊杼曹人邾人杞人次于鄆

定公九年秋齊侯衛侯次于五氏 十三年春齊侯衛

侯次于垂葭 十五年夏齊侯衛侯次于渠蔭

蕙田案以上次左氏傳曰凡師一宿為舍再

宿為信過信為次

莊公十年冬十月齊師滅譚譚子奔莒 十三年夏六

月齊人滅遂

僖公二年夏虞師晉師滅下陽 五年秋八月楚人滅

弦弦子奔黃 十年春秋滅溫溫子奔衛 十二年夏

楚人滅黃 十七年夏滅項 二十五年春王正月丙

午衛侯燬滅邢 二十六年秋楚人滅夔以夔子歸

文公四年秋楚人滅江 五年秋楚人滅六 十六年

秋楚人秦人巴人滅庸

宣公八年夏楚人滅舒蓼 十二年冬十有二月戊寅

楚子滅蕭 十五年六月癸卯晉師滅赤狄潞氏以潞

子嬰兒歸 十六年春王正月晉人滅赤狄甲氏及留

吁

成公十七年冬楚人滅舒庸

襄公六年秋莒人滅鄆冬十有二月齊侯滅萊 十年

夏五月甲午遂滅偃陽 二十五年秋楚屈建帥師滅

舒鳩

昭公四年秋七月遂滅賴 八年冬十月壬午楚師滅

陳 十一年冬十有一月丁酉楚師滅蔡執蔡世子有以歸用之 十三年冬吳滅州來 十七年八月晉荀吳帥師滅陸渾之戎 二十四年冬吳滅巢 三十年冬十有二月吳滅徐徐子章禹奔楚 定公四年四月庚辰蔡公孫姓帥師滅沈以沈子嘉歸殺之 六年春王正月癸亥鄭游速帥師滅許以許男斯歸 十四年二月辛巳楚公子結陳公孫佗人帥師滅頓以頓子牂歸 十五年二月辛丑楚子滅胡以胡子豹歸

蕙田案以上滅夷其社稷曰滅大邑用大師取之亦曰滅

隱公二年夏五月莒人入向無駭帥師入極 五年秋衛師入邲 十年秋宋人衛人入鄭冬十月齊人鄭人

入邲 十一年秋七月壬午公及齊侯鄭伯入許

桓公元年九月入杞

莊公十四年秋七月荆入蔡

閔公二年十有二月狄入衛

僖公二十年夏鄭人入滑 二十七年秋八月乙巳公

子遂帥師入杞 二十八年三月丙午晉侯入曹執曹

伯畀宋人 三十三年春王二月秦人入滑

文公五年夏秦人入郟

宣公十一年冬十月丁亥楚子入陳

成公七年秋吳入州來 九年冬楚人入鄆

襄公二十五年六月壬子鄭公孫舍之帥師入陳

昭公十八年六月邾人入郟

定公四年十有一月庚辰吳入郟 五年夏於越入吳

哀公七年八月己酉入邾以邾子益來 八年春王正月宋公入曹以曹伯陽歸 十三年夏於越入吳

蕙田案以上入左氏傳曰弗地曰入謂破其地而不能有也

莊公八年夏師及齊師圍邾邾降于齊師

僖公六年秋楚人圍許 十九年秋宋人圍曹 二十

五年秋楚人圍陳 二十七年冬楚人陳侯蔡侯鄭伯

許男圍宋 二十八年冬諸侯遂圍許曹伯襄復歸于

曹遂會諸侯圍許 三十年秋晉人秦人圍鄭 三十

一年冬狄圍衛 文公三年秋楚人圍江 十二年夏楚人圍巢

宣公三年秋宋師圍曹 九年冬宋人圍滕 十二年

春楚子圍鄭 十四年秋九月楚子圍宋

成公三年秋叔孫僑如帥師圍棘 九年冬鄭人圍許

襄公元年春仲孫蔑會晉欒黶宋華元衛甯殖曹人莒

人邾人滕人薛人圍宋彭城 四年冬陳人圍頓 七

年冬十月楚公子貞帥師圍陳 十八年冬十月公會

晉侯宋公衛侯鄭伯曹伯莒子邾子滕子薛伯杞伯小

邾子同圍齊

昭公十一年夏四月楚公子棄疾帥師圍蔡 十三年

春叔弓帥師圍費 二十三年春晉人圍郊 二十六

年夏公圍成 定公四年秋楚人圍蔡 五年冬晉士鞅帥師圍鮮虞

六年冬季孫斯仲孫忌帥師圍鄆 十年夏晉趙鞅

帥師圍衛叔孫州仇仲孫何忌帥師圍郕秋叔孫州仇

仲孫何忌帥師圍郕 十二年十有二月公圍成

哀公元年春王正月楚子陳侯隨侯許男圍蔡 三年
春齊國夏衛石曼姑帥師圍戚冬叔孫州仇仲孫何忌
帥師圍邾 七年秋宋人圍曹

蕙田案以上圍環而攻之曰圍

莊公六年春王正月王人子突救衛 二十八年秋公
會齊人宋人救鄭

閔公元年春王正月齊人救邢

僖公元年春王正月齊師宋師曹伯次于聶北救邢

六年秋諸侯遂救許 十五年三月公孫敖帥師及諸

侯之大夫救徐 十八年夏師救齊

文公九年三月公子遂會晉人宋人衛人許人救鄭

宣公元年秋晉趙盾帥師救陳 九年冬晉卻缺帥師

救鄭 十二年冬衛人救陳

成公六年冬晉欒書帥師救鄭 七年秋公會晉侯齊

侯宋公衛侯曹伯莒子邾子杞伯救鄭

襄公五年冬公會晉侯宋公衛侯鄭伯齊世子光救陳

十年冬楚公子貞帥師救鄭 十二年春王二月季

孫宿帥師救台遂入鄆 十五年夏公救成至遇 二

十三年八月叔孫豹帥師救晉次于雍榆

哀公七年冬鄭駟宏帥師救鄭 十年冬吳救陳

蕙田案以上救赴難曰救左氏傳曰凡書救
善之也

莊公十有八年夏公追戎于濟西

僖公二十六年春公追齊師至鄆弗及

蕙田案以上追敵已去而躡之曰追

僖公二十八年春公子買戍衛不卒戍刺之

襄公五年冬成陳 十年冬成鄭虎牢

蕙田案以上成以兵守之曰成

又案春秋書戰事為例十有三雖未盡合周禮然猶近古與後世專以殺人為功者有間

僖公二十六年公子遂如楚乞師

成公十三年春晉侯使卻錡來乞師 十六年夏晉侯

使欒黶來乞師 十七年秋九月晉侯使荀罃來乞師

十八年冬晉侯使士魴來乞師

蕙田案以上乞師

右用師名目

書武成丁未祀于周廟邦甸侯衛駿奔走執豆籩越三

日庚戌柴望大告武成

真氏德秀曰此武功成告祖及天之禮先祖後郊者鄭氏謂其自近始蔡氏以為由親而尊竊以謂武王伐商受命于文考及其成功也先告焉因告文考遂

及七世之廟故又三日然後以所以成文考之志者告天焉蓋武王成文考之志而文考又所以成天之志也豈以遠近為先後哉

周禮春官大司樂王師大獻則令奏愷樂注大獻獻捷于祖愷樂獻功之樂鄭司農

說以春秋晉文公敗楚于城濮傳曰振旅愷以入于晉疏鄭志趙商問大司馬云師有功則愷樂獻于社春官大司樂云王師大獻則令奏愷樂注云大獻獻捷

于祖不違異意答曰司馬云師大獻則獻社以軍之功故獻于社大司樂宗伯之屬宗伯主于宗廟之禮故獻于祖也

樂師凡軍大獻教愷歌遂倡之注鄭司農云樂師主倡也疏大獻者謂師克勝獻捷于祖廟也云教愷

歌者愷謂愷詩師還未至之時預教瞽瞍入祖廟遂使樂師倡道為之故云遂倡之

鄭氏鏗曰王師大獻令奏愷樂則王親征之師故大司樂合之軍大獻教愷歌遣將出軍而歸故樂師教之又倡之異尊卑

李氏嘉會曰愷歌于堂上愷樂作于堂下二者相應愷歌在前樂師倡之

罍師軍大獻則鼓其愷樂疏軍大獻謂獻捷于祖

詩周頌酌序酌告成大武也

於鑠王師遵養時晦時純熙矣是用大介我龍受之躋

躋王之造載用有嗣實維爾公允師

孔叢子問軍禮然後鳴金振旅有司徧告捷于時所

有事之山川既至舍于國外三日齊以特牛親格于祖禰然後入設奠以反主若主命則卒奠斂玉埋之於廟兩階間

唐開元禮凱旋告廟陳俘馘于南門外北面西上軍實陳于後其告奠之禮皆與告禮同解嚴未解嚴前一日本司各隨職供辦尚舍奉御座于太極殿中楹間南向如常守宮設文武百官次于東西朝堂奉禮于東西朝堂設文武官版位如初典儀設位于殿廷文東武西皆重行北向相對為首設典儀位于東階革輅旌旗之屬于殿廷其日平明諸衛各勒所部屯門列仗百官服袴褶戎服皆集朝堂晝漏上水五刻侍中版奏請中嚴鉞戟以次列于殿廷上水七刻典謁引群官以次入就位上水十刻應奉迎之官詣閣奏迎侍中版奏外辦皇帝

服通天冠絳紗袍御輿以出曲直華蓋警蹕如常皇帝出自西房即御座侍臣夾侍如常典儀稱再拜贊者承傳群官皆再拜通事舍人以次引群官出侍中跪奏稱禮畢俛伏興還侍位皇帝降座御輿入自東房侍臣從至閣如常

通典武德元年十一月秦王平薛仁果凱旋獻于太廟四年七月秦王平東都被黃金甲陳鐵馬一萬甲士三萬以王世充竇建德及隋文物輦路獻捷于太廟

貞觀四年三月李靖俘頡利可汗獻捷于太廟遼史禮志下城克敵班師以所獲牡馬羊各一祭天地明會典軍凱還皇帝率諸將以凱樂俘馘陳于廟社門外告畢以俘馘付刑部協律郎導樂以退其告祭用三獻禮儀與出師同

蕙田案漢唐以下凱還儀節歷代不同未便
細分如此段告廟而兼之告社是也今一以
經為主此段入告廟即不復入告社餘倣此
又案此凱旋告天地宗廟

周禮夏官大司馬若師有功則左執律右秉鉞以先愷
樂獻于社注功勝也律所以聽軍聲鉞所以為將威也先猶道也兵書曰愷獻于社獻功于社也司馬法曰得意則愷樂愷歌示喜也

春官大祝大師軍歸獻于社則前祝反行舍奠注舍奠之禮所以告至

孔叢子問軍禮反社主如初迎之禮

禮記王制天子出征執有罪反釋奠于學以訊馘告注

菜奠幣禮先師也訊馘所生獲斷耳者詩曰執訊獲醜又曰在類獻馘疏出師征伐執此有罪之人還反而歸釋菜奠幣于學以可言問之訊馘左耳之馘告先

聖先師也

禮經補逸汪氏克寬曰訊者問其首惡馘者截其左耳夫執訊獲醜而反舍奠于先聖先師以是告之者蓋始出征受成于學今師還以武功告成于文德之地明不專恃乎威戮而必任之以德禮也昔僖公在類獻馘而國人以文武頌之者亦以此歟

詩魯頌泮水矯矯虎臣在泮獻馘淑問如臯陶在泮獻

孔叢子問軍禮舍奠于帝學以訊馘告大亨于群吏

用備樂 蕙田案此凱旋釋奠于學

詩小雅出車序出車勞還率也

我出我車于彼牧矣自天子所謂我來矣召彼僕夫謂

之載矣王事多難維其棘矣 我出我車于彼郊矣設
此旒矣建彼旄矣彼旒旒斯胡不旆旆憂心悄悄僕夫

况瘁 王命南仲往城于方出車彭彭旂旒央央天子
命我城彼朔方赫赫南仲玁狁于襄 昔我往矣黍稷
方華今我來思雨雪載塗王事多難不遑起居豈不懷
歸畏此簡書 嘒嘒草蟲趯趯阜螽未見君子憂心忡
忡既見君子我心則降赫赫南仲薄伐西戎 春日遲
遲卉木萋萋倉庚喈喈采芣祁祁執訊獲醜薄言還歸
赫赫南仲玁狁于夷

蕙田案此凱旋勞還率

周禮春官眡瞭賓射奏其鐘鼓鼗愷獻亦如之

注凱獻獻功愷樂也杜子

春讀鼗為憂戚之戚謂戒守鼓也擊鼓聲疾數故曰戚疏鼗謂夜

戒守之鼓愷獻謂戰勝獻俘之時作愷樂二者皆眡瞭奏其鐘鼓

春秋僖公二十八年左氏傳晉侯獻楚俘于王駟介百
乘徒兵千鄭伯傳王用平禮也已酉王享醴命晉侯宥
王命尹氏及王子虎內史叔與父策命晉侯為侯伯賜

之大輅之服戎輅之服彤弓一彤矢百旅弓矢千秬鬯
一卣虎賁三百人曰王謂叔父敬服王命以綏四國糾
逖王慝晉侯三辭從命曰重耳敢再拜稽首奉揚天子
之不顯休命

真氏德秀曰此古人獻俘策命之禮見于春秋者

秋七月丙申振旅愷以入于晉獻俘授馘飲至大賞徵
會討貳殺舟之僑以徇于國民於是大服

真氏德秀曰此雖春秋時事而亦可見三代振旅凱旅之遺制

昭公十年左氏傳季平子伐莒取郟獻俘

十七年左氏傳晉荀吳滅陸渾獻俘于文宮

隋書高祖本紀開皇九年春正月陳國平四月乙巳三

軍凱入獻俘于太廟

唐書高祖本紀武德元年十一月癸亥秦王世民俘薛

仁杲以獻 四年五月壬戌秦王世民敗竇建德于虎牢執之七月甲子秦王世民俘王世充以獻

唐會要武德四年秦王世民平東都被黃金甲乘戎輅李世勣等二十五將從其後陳鐵騎一萬甲士三萬前後部鼓吹俘王世充竇建德及隋器物輦輅獻于太廟

蕙田案唐秦王破宋金剛李勣平高麗皆凱歌入京師其樂歌則有破陣樂應聖朝等篇

其奏樂則有饒歌鼓吹二部笛箏篳篥箏鼓等器至廟社但陳列于門外不奏歌曲俟告獻禮畢復奏曲如儀以廟社尊嚴之地饒吹諠譁恐乖肅敬故不奏曲

唐書太宗本紀貞觀四年三月李靖俘突厥頡利可汗以獻 十四年十二月丁酉侯君集俘高昌王以獻

高宗本紀永徽元年九月高侃俘突厥車鼻可汗以獻

王綝傳綝字方慶神功初清邊道大總管武攸宜破契丹凱還且獻俘內史王及善以孝明帝忌月請鼓吹備而不作方慶白晉穆帝納后當康帝忌月時以為疑荀訥謂禮有忌日無忌月世用其言臣謂軍方大凱作樂無嫌詔可

元宗本紀開元二十年正月信安郡王禕為河東河北道行軍副元帥以伐奚契丹五月戊申忠王浚俘奚契丹以獻

宋史太祖本紀建隆元年六月辛未拔澤州筠赴火死丁亥筠子守節以城降九月甲子歸太原俘

禮志宋制親征納降獻俘皆遣官奏告天地宗廟社稷諸陵嶽瀆山川宮觀在京十里內神祠其儀用犧尊邊

豆各一實以酒脯醢宮寺以素饌時果代用祝幣行一
獻禮建隆元年太祖平澤潞仍祭祆廟泰山城隍用此
禮

太祖本紀乾德三年春正月乙酉蜀王孟昶降

禮志受降獻俘太祖平蜀孟昶降詔有司約前代儀制
為受降禮昶至前一日設御座仗衛于崇元殿如元會
儀至日大陳馬步諸軍于天街左右設昶及其官屬素
案席褥于明德門外表案于橫街北通事舍人引昶及
其官屬素服紗帽北向序立昶跪奉表授閣門使復位
待命表至御前侍臣讀訖閣門使承旨出昶等俯伏通
事舍人掖昶起官屬亦起宣制釋罪昶等再拜呼萬歲
衣庫使導所賜襲衣冠帶陳于前昶等又再拜跪受改
服乘馬至昇龍門下馬官屬至啟運門下馬就次帝常

服升坐百官先入起居班立閣門使引昶等入舞蹈拜
謝召昶升殿閣門使引自東階升宣撫使承旨安撫之
昶至御座前躬承問訖還位與官屬舞蹈出中書率百
官稱賀遂宴近臣及昶于大明殿

太祖本紀開寶四年春正月己丑潘美克廣州俘劉鋹
廣南平五月乙未朔御明德門受劉鋹俘釋之

禮志嶺南平劉鋹就擒詔有司撰獻俘禮鋹至上御明
德門列仗衛諸軍百官常服班樓前別設獻俘位於東
西街之南北向其將校位于獻俘位前北上西向有司
率武士係鋹等白練露布前引至太廟西南門鋹等並
下馬入南神門北向西上立監將校官次南立俟告禮
畢于西南門出乘馬押至大社如上儀乃押至樓南御
路之西下馬立俟獻俘將校戎服帶刀攝侍中版奏中

嚴百官班定版奏外辦帝常服御座百官舞蹈起居畢
通事舍人引銀就獻俘位將校等詣樓前舞蹈訖次引
露布案詣樓前北向宣付中書門下如宣制儀通事舍
人跪受露布轉授中書門下轉授攝兵部尚書次攝刑
部尚書詣樓前跪奏以所獻俘付有司上召銀詰責銀
伏地待罪詔誅其臣襲澄樞等特釋銀縛與其弟保興
等罪仍賜襲衣冠帶鞞笏器幣鞍馬各服其服列謝樓
下百官稱賀畢放仗如儀

太祖本紀開寶八年十一月乙未曹彬克昇州俘其國
主煜江南平九年春正月辛未御明德門見李煜于樓
下不用獻俘儀

禮志南唐平帝御明德門露布引李煜及其子弟官屬
素服待罪初有司請如獻劉鋹帝以煜奉正朔非若鋹
拒命寢露布弗宣遣閣門使承制釋之

太宗本紀太平興國四年五月甲申劉繼元降北漢平
禮志太宗征太原劉繼元降帝幸城北陳兵衛張樂宴
從臣於城臺繼元率官屬素服臺下遣閣門使宣制釋
罪召繼元親勞之從臣詣行宮稱賀時以在軍中故不
備禮繼元至京師詔告獻太廟前一日所司陳設如常
告廟儀告日黎明博士引太尉就位通事舍人引繼元
西階下東向立其官屬重行立贊者贊太尉再拜訖博
士引就盥爵如常儀詣東階解劍脫舄升第一室進奠
再拜太祝跪讀祝文訖又再拜通事舍人引繼元及官
屬詣室前西階下北向立舍人贊云皇帝親征收復河
東僞主劉繼元及僞命官見贊者曰再拜訖退位次至
第二第三第四第五室皆如第一室博士引太尉降階

佩劍納履位贊者曰再拜太尉與繼元等皆再拜退焚祝版於齋坊繼元既命以官故不稱俘焉

寧宗本紀開禧三年春正月甲午吳曦僭位于興州二月四川宣撫副使司隨軍轉運安丙及興州中軍正將李好義監四川總領所興州合江倉楊巨源等共誅吳曦傳首詣行在獻于廟社

禮志開禧三年三月四川宣撫副使安丙函逆臣吳曦首并違制剗造法物所受金國加封蜀王詔及金印來獻四月三日禮部太常寺條具獻馘典故俟逆曦首函至日臨安府差人防守殿前司差甲士二百人同大理寺官監引赴都堂審驗奏獻太廟別廟差近上宗室南班奏獻太社太稷差侍從官各前一日赴祠所致齋至日行奏獻之禮大理寺殿前司計會行禮時刻監引首

函設置以俟奏獻禮畢臬于市三日付大理寺藏于庫

宋政和五禮新儀師旋奏凱某日大將勒所部兵衛執

俘陳於都門外鼓吹令丞押凱樂分前後二部並其次

第陳列將入都門鼓吹振作迭奏樂歌其詞隨時撰述行至太

廟及太社門工人下馬陳列于門外奏歌曲俟告獻禮

畢復導引奏曲至宣德門樓前兵仗外二十步樂工皆

下馬徐行前進兵部尚書於中路前導至樓下次協律

郎二人公服執麾分導鼓吹令引樂工等至獻俘位之

南面重行立定大司樂于樂工之前俛伏跪奏具官臣

某言請奏凱樂協律郎舉麾鼓吹大作徧奏樂曲協律

郎偃麾樂止大司樂跪奏臣某言奏凱樂畢兵部尚書

大司樂退協律郎導鼓吹令引樂工等並於兵仗外序

立次引復入獻如別儀獻俘前期殿中監帥其屬尚舍

設御座于宣德門樓上前楹當中南向又設御幄于御座之右北儀鸞司分設文武百僚及獻俘將校次于樓下之左右隨地之宜其日未明尚書兵部率其屬陳列黃麾大仗于樓前東上閣門御史臺太常寺設文武百僚等班位並如受降之儀又設獻俘位于樓前少南又設獻俘將校位于獻俘位之北刑部尚書奏請獻俘位又於其北並北向門下侍郎受露布于樓下之東兵部尚書位於其南並西向文武百僚諸方客使各赴樓前就位次皇帝常服出內東門先知客省事以下六尚局應奉官祇應武功大夫至保義郎知內侍省事以下帶御器械官闕班立定屏門開先禁衛諸班親從等迎駕自贊常起居次知客省事以下知內侍省事以下常起居次樓上侍立知樞密院官翰林學士承旨宣名常起

居貯廊南管軍臣寮宣名常起居訖

管軍臣僚導從駕至僚門導赴門下侍立

皇帝

乘輿升宣德門樓降輿歸御幄禮直官舍人分引文武百僚就位立定樓東上閣門進班齊牌以紅條袋引升樓上東上閣門附內侍進訖內侍承旨索扇扇合皇帝即御座簾捲內侍又贊扇扇開侍衛如常儀諸班親從并裏圍人等迎駕自贊常起居次舍人贊執儀將士常起居次禮直官舍人分引文武百僚橫行北向贊曰拜在位官皆再拜搢笏舞蹈三呼萬歲又再拜班首奏聖躬萬福又再拜訖禮直官舍人分引各就東西序立次樓上侍臣承旨進詣樓前宣引獻俘宣訖將校執俘就北面位立定東上閣門官引露布案于樓前北向稱宣附訖附門下省東上閣門官案西東向立引門下侍郎于案南北向搢笏跪提點承受關耶仁首承受于案上捧露布躬

授門下侍郎俛伏興置案于近北東上閣門官隨案退
 門下侍郎以露布傳授通事舍人折方南方文武班南
 宣宣訖通事舍人捧露布跪授門下侍郎轉授兵部尚
 書次禮直官引刑部尚書進當樓前俛伏跪進奏具官
 臣某言某使某官某以某處所俘執獻請付所司奏訖
 復位以俟旨合就刑者立于西廂東向禮直官引大理
 卿受之詣法場准式若上命釋罪者通事舍人詣樓前
 南向宣有勅釋縛釋訖俟命又東上閣門官宣制釋
 放其詞學士院
隨事撰述宣訖通事舍人贊謝恩拜再拜隨拜三稱萬
 歲訖於東廂西向序立如有賜物即臨時承旨宣
賜贊謝恩如受降之儀贊樓上侍郎
 立官稱賀再拜禮直官舍人分引文武百僚橫行北向
 立定贊者曰拜在位官皆再拜班首少前俛伏跪稱賀
 訖其詞中書省
隨事撰述俛伏興退復位贊者曰拜在位官皆再拜摺

笏舞蹈三稱萬歲又再拜東上閣門官進詣樓前承旨
 就班首宣曰有制贊者曰拜在位官皆再拜宣答訖其詞
學士
院隨事
撰述贊者曰拜在位官皆再拜摺笏舞蹈三稱萬歲又
 再拜分班樓上樞密院少進前俛伏跪奏稱具官臣某
 言禮畢俛伏興退復位內侍承旨索扇扇合皇帝降座
 簾降內侍省贊扇開所司承旨放仗樓下鳴鞭贊文武
 百僚再拜訖退皇帝乘輿還內如常儀
 明典禮志洪武四年秋七月乙丑指揮萬德送明昇並
 降表至京師初上聞大軍下蜀命中書集六部太常翰
 林院定議受降等禮省部請如宋太祖乾德三年受蜀
 主孟昶降禮上御奉天門昇等于午門外跪進待罪表
 侍儀使捧表入宣表官宣讀訖承制官出傳制官出傳
 制賜衣服冠帶昇等皆俯伏于地侍儀舍人掖昇起其

屬官皆起跪聽宣制釋罪昇等五拜三呼萬歲承制官傳制賜衣服冠帶侍儀舍人引昇入丹墀中四拜侍儀使傳旨昇跪聽宣諭俯伏四拜三呼萬歲又四拜出丞相率文武百官行賀禮上曰明昇與孟昶不同昶專治國政所為奢縱昇年幼事由臣下宜免其叩頭伏地上表請罪之禮是日昇及其官屬朝見百官稱賀制授昇為歸義侯賜冠帶衣服及居第于京師

明會典永樂四年定獻俘前期兵部官以露布奏聞禮部告示文武百官具朝服并坊廂里老人等行慶賀禮先一日內官設御座于午門樓前楹正中是日錦衣衛設儀仗于午門前御道之東西教坊司陳大樂于御道南東西北向鴻臚寺設贊禮二人于午門前東西相向承制官一員位于午門前東立西向設宣制位于午門

東稍南西向設文武官及諸蕃使客人等待立位于樓前御道南文東武西相向設露布案于午門前御道東設宣露布官一員展露布官二員及刑部獻俘官位于午門前御道東稍南西向設獻俘將校位于午門前御道西稍南北向設進露布官位于御道南稍東引禮引文武官東西序立引進露布官捧露布置于案退就位獻俘將校引俘列于午門前西邊武班之後以俟上常服御奉天門鐘聲止鴻臚寺跪奏請上乘輿樂作至午門樓上陞座樂止鳴鞭訖贊禮贊進露布官四拜樂作平身樂止贊進露布樂作執事者舉案置于中道樂止贊宣露布官跪宣露布官與展露布官詣案前取露布跪宣訖仍置於案退贊俯伏與樂作四拜平身樂止執事者舉案復置于御道東引禮引進露布官退贊獻俘

獻俘將校引俘至獻俘位北向立定俘跪于前刑部官
詣樓前中道跪奏云具官臣某奏云某官以某處所俘
獻請付所司伺旨有合受刑者立于西廂東向以付刑
官若上釋罪承制官詣御道跪請制由東街南行至宣
制位西向立稱有制所獲俘囚咸赦其罪宣旨曰有敕
釋縛所釋之俘叩頭訖將校引俘起引禮贊文武百官
入班北向立唱排班班齊致詞官詣中道跪致詞云云
賀訖贊鞠躬樂作五拜三叩頭興平身樂止鴻臚寺跪
奏禮畢樂作駕興樂止百官以次退次日行開讀禮如
常儀第三日文武百官上表行慶賀禮如常儀

凡各處奏捷鴻臚寺于早朝將差來人役引至御前宣
讀捷音隆慶六年令擇吉宣捷至日不奏事次日行慶
賀禮

王圻續通考獻俘儀注穆宗隆慶四年十二月禮部奏
是日文武百官具朝服詣午門前行慶賀禮先一日內
官設御座于午門樓前楹正中是日早錦衣衛設儀仗
于午門前御道之東西向教坊司陳大樂于御道南東
西相向鴻臚寺設贊禮二人于午門前東西相向設文
武官侍立位于樓前御道南文東武西相向及刑部獻
俘官位于午門前御道東稍南西向設獻俘將校位于
午門前御道西稍南北向引禮引文武官東西序立獻
俘將校引俘列于午門前西邊文武班之後伺候上常
服御皇極門鐘聲止鴻臚寺跪奏請上乘輿樂作至午
門樓上陞座樂止鳴鞭訖鴻臚寺官宣奏畢贊獻俘將
校引俘至獻俘位北向立定俘跪于將校之前刑部官
詣樓前中道跪奏云具官臣某奏云某官以某處所俘

五
獻請付所司候旨傳下刑部官承旨訖即同將校押出
施行文武百官入班北向立唱排班班齊致詞官詣中
道跪致詞稱賀訖贊鞠躬樂作五拜三叩頭興平身樂
止鴻臚寺官跪奏禮畢樂作駕興樂止百官以次退
〔湧幢小品〕上御午樓獻俘奏事畢上曰拿去廷臣尚
未聞聲左右勲戚接者二遞爲四乃有聲又爲八爲
十六漸震爲三十二最下則大漢將軍三百六十人
齊聲如轟雷矣

蕙田案以上獻俘

通典後魏每攻戰克捷欲天下聞知乃書帛建于漆竿
上名爲露布彭城王勰曰露布者布于四海露之耳目
蓋謂獻捷之書不封而以告諭于天下也

隋文帝開皇中詔太常卿牛弘太子庶子裴政撰宣露
布禮及九年平陳元帥晉王以驛上露布兵部奏請依
新禮集百官四方客使等並赴廣陽門外朝服朝衣各
依其列內史令稱有詔在位者皆拜宣訖蹈舞者三又
拜而罷

唐開元禮宣露布其日守官量設群官次露布至兵部
侍郎奉以奏聞仍承制集文武群官客使於東朝堂群
官客使至俱就次各服其服奉禮設群官版位于東朝
堂之前近南文東武西重行北向相對爲首又設客使
各如常儀設中書令于群官之北南面量時刻吏部兵
部贊群官客使出次謁者贊引就位立定中書令受露
布置于案令史二人絳公服對舉之典謁者引中書令
舉案者從之出就南面位持案者立于中書令西南東
面立定持案者進中書令取露布持案者退復位中書

五卷
禮部考卷之三
令稱有制群官客使皆拜再拜中書令宣露布訖群官
客使又再拜皆舞蹈訖又再拜謁者引兵部尚書進中
書令前受露布退復位兵部侍郎前受之典謁引中書
令入謁者引群官客使各還次

郭正域典禮志永樂四年定前期兵部官以露布奏聞
文武百官具朝服先一日內官設御座于午門樓前楹
正中是日早錦衣衛設儀仗于午門前御道之東西教
坊司樂陳大樂于御道西南東西相向鴻臚寺設贊禮
二人于午門前東西相向承制官一人位于午門前西
向設宣制位于午門東稍南西向設文武官及諸蕃使
客人等待立位于樓前御道南東西向設露布案于午
門前御道東設宣露布官一展宣露布官二及刑部獻
俘官位于午門前御道西向設獻俘將校位于午門

前御道西北向設進露布官位于御道南稍東引禮導
文武官東西序立引進露布官捧露布置于案退就位
獻俘將校引俘列于午門前武班之後上常服御奉天
門鐘聲止鴻臚寺跪奏請上乘輿樂作至午門樓上陞
座樂止鳴鞭訖贊禮贊進露布官四拜樂作平身樂止
贊進露布樂作執事者舉案置于中道樂止宣露布贊
獻俘獻俘將校引俘至北向立俘跪于前刑部官詣樓
前中道跪奏曰某官臣某奏曰某官以某處所獻俘請
付所司伺旨有合受刑者立于西廂東向以付刑官若
上釋罪承制官詣御道跪請制由東街南行至東制位
西向立稱旨曰所獲俘囚咸赦其罪宣旨曰有勅釋縛
所釋之俘將校引俘起文武百官入班北向立致詞官
跪致詞賀訖樂作五拜三叩首興樂止樂作駕輿百官

以次退次日行開讀禮如常儀第三日文武百官上表
行慶賀禮如常儀

〔潘昂霄金石例〕露布之名始于漢案光武紀注漢制
度曰制詔三公皆璽封尚書令印重封露布州郡祭
祀志注引東觀書有司奏孝順號露布奏可又鮑昱
詣尚書封胡降檄曰故事通官文書不著姓又當司
徒露布李雲露布上書注謂不封也魏改元景初詔
曰司徒露布咸使聞知蜀漢建興五年春伐魏詔曰
丞相某露布天下此皆非將帥獻捷所用後魏王肅
獲賊二三皆為露布韓顯宗有高曳長縑虛張功捷
之譏孝文稱傅脩期下馬作露布齊神武破芒山軍
為露布杜弼即書絹不起草唐制下之通上其制有
六三曰露布兵部侍郎奉以奏聞集群官東朝堂中

書令宣布張九齡為崑邱道記室平龜茲露布為士
所稱于公異為昭討府掌書記朱泚平露布曰臣既
肅清宮禁祇奉寢園鐘簾不移廟貌如故德宗咨歎
焉東晉未有露布隆興初以晉破苻堅命題似有可
疑然文章緣起曰漢賈洪為馬超伐曹操作而魏志
注謂虞松從司馬宣王征遼東及破賊作露布隋志
有魏武帝露布文九卷世說云桓溫北征令袁宏倚
馬前作露布手不輟筆俄成七紙則魏晉已有之嘗
考宋朝王之擬李靖平突厥露布此擬題之始歟

蕙田案以上宣露布

又案獻俘與宣露布二事相連分而實合但
獻俘見于經宣露布起于後世故以獻俘居
前次宣露布附焉

右凱旋告祭獻俘

宣露布附

春秋成公二年左氏傳晉侯使鞏朔獻齊捷于周王弗見使單襄公辭焉曰蠻夷戎狄不式王命淫泆毀常王命伐之則有獻捷王親受而勞之所以懲不敬勸有功也兄弟甥舅侵敗王略王命伐之告事而已不獻其功所以敬親暱禁淫慝也今叔父克遂有功于齊而奸先王之禮余雖欲于鞏伯其敢廢舊典以忝叔父夫齊甥舅之國也而太師之後也寧不亦淫從其欲以怒叔父抑豈不可諫誨士莊伯不能對王使委于三吏禮之如侯伯克敵使大夫告慶之禮

二年左氏傳鄭皇成如楚獻捷

襄公二十五年左氏傳鄭伐陳入之子產獻捷于晉戎服將事晉人問陳之罪對曰昔虞閔父為周陶正以服

事我先王我先王賴其利器用也與其神明之後也庸以元女大姬配胡公而封諸陳以備三恪則我周之自出至于今是賴桓公之亂蔡人欲立其出我先君莊公奉五父而立之蔡人殺之我又與蔡人奉戴厲公至于莊宣皆我之自立夏氏之亂成公播蕩又我之自入君所知也今陳忘周之大德蔑我大惠棄我姻親介恃楚眾以憑陵我敝邑不可億逞我是以有往年之告未獲成命則有我東門之役當陳隧者井堙木刊敝邑大懼不競而恥大姬天誘其衷故敝邑心陳知其罪授手于我用敢獻功晉人曰何故戎服對曰我先君武莊為平桓卿士城濮之役文公布命曰各服舊職命我文公戎服輔王以授楚捷不敢廢王命故也士莊伯不能詰乃受之

王圻續通考奏捷儀注凡各處奏捷鴻臚寺於早朝將
差來人役引至御前宣讀捷音

隆慶六年令擇吉宣捷至日不奏事次日行慶賀禮
神宗八年定凡大捷於常朝期宣奏捷音是日百官各
具吉服候宣捷之後鴻臚寺官致詞行五拜三叩頭禮
本日早即遣官薦告郊廟行翰林院撰文太常寺辦祭
品中捷以下立宣捷不行祭告慶賀禮

右獻捷

宋史哲宗本紀元符二年秋七月丙寅洮西安撫使王
瞻復邈川城西蕃首領欽彪阿成以城降

禮志元符二年西蕃王攏拶邈川首領瞎征等降詔具
儀注以受降日御宣德門設諸班直上四軍仗衛諸軍
素服陳列降者各服蕃服以見審問訖有旨放罪各等

第賜首服袍帶百官稱賀訖再御紫宸殿賜宴會哲宗
崩樞密院留攏拶等西京聽旨詔罷御樓立仗但引見
于後殿攏拶一班契丹公主一班夏國回鶻公次之瞎
征一班邊厮波結并族屬次之應族屬首領各從其長
以次起居僧尼公主皆蕃服蕃拜並賜冠服謝訖賜酒
饌橫門外

政和初議禮局上受降儀皇帝乘輿升宣德門樓降輿
坐御幄百官與降王蕃官各班樓下如大禮肆赦儀東
上閣門以紅條袋班齊牌引升樓樓上東上閣門官附
內侍承旨索扇扇合帝即御坐簾捲內侍又贊扇開侍
衛如常儀諸班親從并裏圍降王人等迎駕自贊常起
居次舍人贊執儀將士常起居次管幹降王使臣并隨
行舊蕃官常起居次禮直官舍人引百官橫行北向贊

者曰拜在位官皆再拜舞蹈三稱萬歲又再拜班首奏
 聖躬萬福又再拜退百官各就東西位舍人引降王服
 本國衣冠詣樓前北向女婦少西立僧又少西尼立于
 後入內省官詣御坐前承旨傳樓上東上閣門官承旨
 錄訖以紅條袋降制樓下東上閣門官承旨退降王以
 下俯伏東上閣門官至令通事舍人掖之起首領以下
 皆起鞠躬閣門宣有勅降王以下再拜僧尼止躬呼萬
 歲閣門錄勅旨付管幹官降王等躬聽詰問如有復奏
 閣門錄訖仍以紅條袋引升樓如無復奏入內省官詣
 御坐承旨傳樓上閣門官稱有勅放罪訖舍人贊謝恩
 降王以下再拜稱萬歲復序立入內省官詣御坐承旨
 傳樓上閣門官稱有勅各賜首服袍帶樓下閣門官承
 旨引所賜檐牀陳于西舍人宣曰有勅降王以下再拜

鞠躬舍人稱各賜某物賜物畢又再拜稱萬歲若賜官
 即贊謝再拜並歸次易所賜服舍人先引降王以下至
 授遥郡以上當樓前北向東上立贊再拜稱萬歲又再
 拜次贊服冠帔婦女再拜僧尼別謝引還次贊樓上侍
 立官稱賀再拜禮直官舍人分引百官橫行北向立贊
 拜訖班首少前俛伏跪稱賀其詞中書隨事撰述賀訖
 復位在位者又再拜舞蹈三稱萬歲又再拜東上閣門
 官進詣樓前承旨就班首宣曰有制贊者曰拜在位官
 皆再拜宣答其詞學士院隨事撰述又贊再拜三稱萬
 歲又再拜樓上樞密院前跪奏稱某官臣某言禮畢內
 侍索扇扇合簾垂帝降坐內侍贊扇開所司承旨放仗
 樓下鞭鳴百官再拜退

蕙田案受降秦漢以下有之儀制自宋史始

故首宋

右受降

詩小雅六月吉甫燕喜既多受祉來歸自鎬我行永久

飲御諸友魚鼈膾鯉侯誰在矣張仲孝友箋吉甫既伐獫狁而歸天子以燕禮

樂之則歡喜矣又多受賞賜也御侍也王以吉甫遠從鎬地來又日月長久今飲之酒使其諸友恩舊者侍之又加其珍美之饌所以極勸也

春秋隱公五年左氏傳臧僖伯曰三年而治兵入而振

旅歸而飲至以數軍實注飲于廟以數軍徒器械及所獲也昭文章明貴賤辨

等列順少長習威儀也

桓公十六年秋七月公至自伐鄭左氏傳夏伐鄭秋七

月公至自伐鄭以飲至之禮也

孔叢子問軍禮饗有功于祖廟舍爵策勲焉謂之飲

至此天子親征之禮也

陳書宣帝本紀大建八年夏四月甲寅詔曰元戎凱旋

群師振旅旌功策賞宜有享宴今月十七日可幸樂遊

苑設絲竹之樂大會文武

舊唐書太宗本紀貞觀十四年十二月丁酉交河道旋

師吏部尚書陳國公侯君集執高昌王麴智盛獻捷于

觀德殿行飲至之禮

王圻續通考成祖永樂十二年二月詔親征瓦剌三月

車駕發北京六月壬寅朔寇答里巴馬哈木太平把禿

孛羅等率眾逆我師上麾柳升等發神機銃砲親率鉄

騎擊之答里大敗上還帳中皇太孫入見上曰此賊尚

未還遲明追撲之必盡殲乃已皇太孫對曰陛下督戰

勤勞天威所加虜眾破膽矣今既敗走假息無所寧敢

返顧乎請不須窮追宜及時班師上然之庚戌班師戊

午駐蹕三峰山之西南和寧王阿魯台遣所部都督朶

兒只咎卜等來朝命中官王安齋勅往勞之己巳車駕次黑山峪勅皇太孫以班師告天地宗廟社稷遂頒詔天下八月辛丑朔車駕至北京上御奉天殿受賀大宴文武群臣及從征將校命禮部會議將士功賞宣德三年八月召公侯伯五軍都督府諭曰北寇擾邊朕將親歷諸關警飭兵備丁未發京師九月命諸將搜山谷約畢至則班師戊午召文武大臣諭曰諸將至者今已六七孟冬廟享之期不遠應早旋師甲子詔班師車駕發鐵將軍店乙丑駐蹕偏嶺丙寅車駕入喜峰關內庚午駐蹕三河縣在京文武衙門各遣官進平胡表壬申駐蹕齊化門癸酉車駕至京師謁告太廟皇太后置酒上壽

蕙田案以上二事俱有讌樂故采入飲至之

末

右飲至

易師卦上六大君有命開國承家小人勿用

何氏楷曰上處卦末乃師之終功之成論功行賞之時也有命即開國承家之命

李氏九我曰開國承家者所以優功臣而廣封建見聖人待天下之公小人勿用者所以御才將而絕禍端見聖人慮天下之遠

周禮夏官司勳戰功曰多注冠敵出奇若韓信陳平司馬法曰上多是于眾之中比較多少之事故知是克敵出奇比彼為多者也云司

馬法曰上功多虜者彼亦是戰以功多為上居于陳前虜獲俘囚也凡有功者

銘書於王之太常祭于大烝司勳詔之注銘之言名也生則書于王旌以識其人與其

功也死于烝先王祭之詔蓋告其神以辭也

詩大雅江漢釐爾圭瓚秬鬯一卣告于文人錫山土田

于周受命自召祖命虎拜稽首天子萬年傳釐賜也秬黑黍也鬯香草也築煮

合而鬯之曰鬯卣器也九命錫圭瓚秬鬯文人文德之人也諸侯有大功德則賜之名山土田附庸

箋秬鬯黑黍酒也謂之鬯者芬香條鬯也王賜召虎以鬯酒一罇使以祭其宗廟告其先祖諸有德美見記者周岐周也自用也宣王欲尊顯召虎故如岐周使虎受山川土田之賜命用其祖召康公受封之禮岐周周之所

起為其先祖之靈故就之拜稽首者受王命策書也臣受恩無可以報謝者稱言使君壽考而已

通典漢高祖有天下論功定封誓曰黃河如帶泰山如礪國以永存爰及苗裔於是定十八侯之位次以蕭何為第一

光武中興定封功臣詔曰諸將業遠功大誠欲傳于無窮其顯效未酬名籍未立者大鴻臚趣上朕將差而錄之於是封高密侯鄧禹等二十八人

晉太元十年論淮淝之功封謝安廬郡公謝石南康公謝元康樂公謝琰望蔡公桓伊永脩公自餘封拜有差唐高祖武德元年論太原建義功以秦王世民為首長孫順德劉宏基等次之太宗即位定功臣封戶自裴寂以下差功大小第之總四十三人

文獻通考宋定天下賞功臣石守信等有差乾道中以

中興十三處戰功列于銓法

明集禮論功行賞儀注前期內使監陳御座香案于奉天殿如常儀尚寶司設寶案于殿上正中侍儀司設詔書案于寶案之前設誥命案于丹陛正中之北設皇太子諸王侍立位于殿上之東北設承制官承制位于殿上之東及宣制位于丹墀誥命案之北吏部尚書戶部尚書禮部尚書位于殿上之東南設大都督府兵部尚書位于殿上之西南應受賞官拜位于丹墀之中異位重行序立位于丹墀之西南受賞位于誥命案之南受賞執事位于受賞官序立位之西每受賞官用捧誥命捧禮物者各一人知班二人位于受賞官拜位之北東西相向贊禮二人位于知班之北東西相向典儀二人位于丹墀上之南東西相向文武官侍立位于丹墀之北東西相向侍從班起居

注給事中殿中侍御史尚寶卿侍儀司官位于殿上之東懸刀武官位于殿上之西殿前班指揮司三人位于丹陛之西東向光祿寺三人位于丹陛上之東西向拱衛司二人位于殿中門之左右典牧所官二人位于仗馬之前宿衛鎮撫二人位于丹陛下東西相向護衛千戶二十八人位于宿衛鎮撫之南稍後東西相向護衛千戶八人位于奉天殿東西門之左右將軍二人位于殿上簾前之東西將軍六人位于奉天殿門之左右將軍四人位于丹陛上之四隅將軍六人位于奉天門之左右俱東西相向鳴鞭四人位于丹陛之南北向是日擊鼓初嚴金吾衛列旗幟器仗拱衛司設儀仗車輅典牧司陳仗馬虎豹內使監擊執樂工陳樂皆如正會之儀禮部陳設詔書吏部陳設誥命戶部陳設禮物陳設

執事各立于案之左右殿前班糾儀典儀知班贊禮宿衛鎮撫護衛將軍各入就位舍人催受賞官及侍立文武官各具朝服擊鼓次嚴侍從班文武官入迎車駕舍人引受賞官齊班于午門外之南東西相向引文武官齊班于午門之北東西相向擊鼓三嚴侍儀版奏中嚴御用監官奏請皇帝于謹身殿服袞冕皇太子諸王于奉天殿門東耳房具冕服舍人引文武官入就丹墀侍立位引受賞官入就丹墀序立位侍儀版奏外辦皇帝御輿以出仗動樂作侍衛導從如常儀陞御座捲簾鳴鞭樂止司辰報時雞唱訖引進引皇太子諸王自奉天門東門入樂作由東陞殿東門入至侍立位樂止舍人引受賞官入就拜位知班唱班齊贊禮唱鞠躬樂作拜興拜興拜興拜興平身樂止承制官前跪承制由殿

中門出中陛降至宣制位吏部尚書戶部尚書禮部尚書由西門出西陛降立于誥命禮物案之東承制官南向稱有制贊禮唱跪受賞官皆跪承制官宣制曰朕嘉某等為國建功宜加爵賞今授某以某職賜以某物其共承朕命受賜員數不拘多少載在其中宣畢贊禮唱俛伏興樂作拜興拜興平身樂止贊禮唱行賞舍人引受賞官第一人詣案前贊禮唱跪搢笏吏部官捧誥命禮部官捧禮物各授受賞官受賞官受誥命禮物以授左右左右跪受于受賞官之左興退復位贊禮唱出笏俯伏興復位舍人引受賞官復位引以次受賞官詣案前皆如常儀承制官吏部尚書戶部尚書禮部尚書由西陛陞西門入跪上位之西云承制訖興各復位贊禮唱鞠躬樂作拜興拜興樂止贊禮唱搢笏鞠躬三舞蹈跪山呼萬歲山呼萬

歲再山呼萬萬歲樂工齊聲應之出笏俯伏興樂作拜興拜興與拜興平身樂止贊禮唱禮畢侍儀跪奏禮畢鳴鞭皇帝興樂作警蹕侍從導引至謹身殿樂止引進引皇太子諸王還宮舍人引受賞官及文武官以次出至午門外以誥命禮物置于龍亭用儀仗鼓樂各送還本第

右論功行賞

周禮夏官大司馬若師不功則厭而奉主車注鄭司農云厭謂厭冠喪服也軍敗則以喪禮故秦伯之敗于殽也春秋傳曰秦伯素服郊次鄉師而哭元謂厭伏冠也奉猶送也送主歸于廟與社疏厭伏冠者案下曲禮云厭冠不入公門彼差次當總小功之冠以義言之五服之冠皆厭以其喪冠反吉冠于武上向內縫之喪冠于武下向內縫之以伏冠在武故得厭伏之名案檀弓注厭冠喪服其服亦未聞

王弔勞士庶子則相注師敗王親弔士庶子之死者勞其傷者則相王之禮庶子卿大夫之子從軍者或謂之庶士

鄭氏鏐曰奉主車以歸肆師助牽之故肆師云師不功則助牽主車

春官肆師凡師不功則助牽主車

鄭氏鏗曰戰所以全宗社不功而失乎主車是失宗社肆師掌為位以祭宗社為職大司馬于師不功則厭而奉主車肆師為大司馬之助而已

李嘉會曰牽主車亦所以安神靈也

陳氏澹曰囊甲衣韋弓衣甲不入囊弓不入韋示再用也

右師不功

詩小雅采薇序采薇遣戍役也

采薇采薇薇亦作止曰歸曰歸歲亦莫止靡室靡家玁狁之故不遑啟居玁狁之故采薇采薇薇亦柔止曰歸曰歸心亦憂止憂心烈烈載飢載渴我戍未定靡使歸聘采薇采薇薇亦剛止曰歸曰歸歲亦陽止王事靡盬不遑啟處憂心孔疚我行不來彼爾維何維常

之華彼路斯何君子之車戎車既駕四牡業業豈敢定居一月三捷駕彼四牡四牡騤騤君子所依小人所腓四牡翼翼象弭魚服豈不日戒玁狁孔棘昔我往矣楊柳依依今我來思雨雪霏霏行道遲遲載渴載飢我心傷悲莫知我哀

杜序杜勞還役也

有杜之杜有睨其實王事靡盬繼嗣我日日月陽止女心傷止征夫遑止有杜之杜其葉萋萋王事靡盬我心傷悲卉木萋止女心悲止征夫歸止陟彼北山言采其杞王事靡盬憂我父母檀車幘幘四牡瘡瘡征夫不遠匪載匪來憂心孔疚期逝不至而多為恤卜筮偕止會言近止征夫邇止

范氏曰出車勞率故美其功杜勞衆故極其情先

王以已之心爲人之心故能曲盡其情民忘其死以
忠于上也

右遣戍

五禮通考卷第二百三十九

淮陰吳玉搢校字



